

M347: Freiburger Urkunden

- 1,1 allen die disen brief sehent . oder hoerent lesen /. künden wir / Kuonrât
Môrhart von Endingen /. unde sîniu kint /. Walther /. Johannes /. Elisabeth
/. Katharina /. Adelheit /. unde Margareta /.
- 1,2 daz wir alliu sament / einhellicliche / mit Niklawes Môrhartes /. unser
der vore genanten kinde / mâges unde salmannes willen unde gehellunge
/. haben ze koufende gegeben unde ûf gegeben /
- 1,3 ledicliche /. den êrbæren geistlichen hêren /.. dem probeste / unde ... dem
kapitele . des goteshûses / ze allen heiligen / ze Vrîburc / sancte Augustinus
ordenes /. die erbeschaft die wir von in
- 1,4 hatten / an dem guote ze Riegel unde ze Endingen /. dâ von wir in
jærgeliches / zwêne unde drîzic mütte ze zinse gâben /. unde ouch daz
guot ganzliche / daz wir in die selbe erbeschaft unde
- 1,5 in den selben zins / êmâls / êr / dirre kouf geschach / geleit hatten / daz
hier nâch geschriben stât /. umbe ein marc / unde drîzic marke silbers /.
loetiges / Vrîburgær gewæges /. unde sîn wir des
- 1,6 selben silbers ganzliche von in gewert /. unde ist diz daz guot daz wir
in die vore genante erbeschaft unde in den zins geleit haben also dâ vore
geschriben stât /. der hov ze Riegel
- 1,7 den Johannes Hoellîn hæte / unde daz guot daz dâr zuo hoeret daz hier
nâch geschriben stât /. unde lît allez ze Riegel in dem banne /. unde sint
allez ackere / ledic eigen /. bî dem rintwege .
- 1,8 drîe jûchart /.. bî den grebern anderhalb jûchart /.. unde her in baz wider
Riegel / ein anewenter / des sint anderhalb jûchart /. unde bî Riegel ein
sanker anderhalb jûchart /.
- 1,9 wir die vore genanten Kuonrât Môrhart / unde sîniu kint /. haben uns
ouch verzigen vûre uns /. unde vûre alle unser erben unde nâchkomenden
/. gegen den vore genanten geistlichen
- 1,10 hêren . alles des rehtes sô wir an der vore genanten erbescheft /. unde
an dem vore genantem guote hatten /. wir haben ouch gelobet vûre uns /
unde vûre alle unser erben unde nâchkomenden /.
- 1,11 den selben geistlichen hêren /. ire / unde aller ir nâchkomenden wer ze
sînde /. dises vore genanten koufes unde des guotes / in dem rehte also dâ
vore geschriben stât / iemer / gegen allermanneglichem /
- 1,12 also reht ist .. wir / die vore genanten / Kuonrât Môrhart /. unde sîniu kint
/. Walther /. Johannes /. Elisabeth /. unde Katharina /. unde ich der vore
genante Niklawes Môrhart /

- 1,13 der vore genanten kinde mâc / unde salman /. haben ouch gelobet /
mit guoten triuwen / den vore genanten geistlichen hêrren / unde iren
nâchkomenden obe si en wâren / wer ze sînde / vûre
- 1,14 diu vore genanten zwei jungesten kint / Adelheiten unde Margareten / wan
si . noch niut ze iren tagen komen sint /. swenne siu ze iren tagen koment
/. daz siu den selben geistlichen hêrren /
- 1,15 die vore genanten erbeschaft / unde daz vore genante guot / ûf gebent /
unde sich verbindent also siu billîche sôllent / diz vore geschriben dinc stæte
ze habende /. unde wer ze sînde
- 1,16 âne alle geværde . her über ze einem urkünde / ist dirre brief durh unser
der vore genanten aller bete / beidenthalp / mit des êrbærn ritters /. hêrrn
Heinrîches von Munzingen
- 1,17 des burgermeistærs ze Vrîburc / ingesigel besigelt .. ich der selbe ritter .
Heinrîch von Munzingen / burgermeistær ze Vrîburc /. hân durch bete /
der vore genanten /.
- 1,18 Kuonrât Môrhartes /. unde sîner kinde /. unde Niklawes Môrhartes /.
unde der vore genanten geistlichen hêrren /. mîn ingesigel gehenket an
disen brief / ze einem urkünde dises vore
- 1,19 geschribenen dinges /. wan ich dâ bî was /. unde sach / unde hôrte / dô
ez geschach /. hier bî wâren dise geziuge . Huc von Munzingen des vore
genanten ritters sun / Burchart der Schoenmüllær /.
- 1,20 Pêter von Selden /. Berhtolt der Strebær /. Kuonrât Liutolt der schedelær
/.. Affenzagel /. Ruodolv Scheffel von Endingen /. unde ander êrbær liute
genuoge /. diz
- 1,21 geschach / unde wart dirre brief gegeben /. ze Vrîburc / in dem jâre . dô
man zalte / von gotes gebûrte / driuzehen hundert jâr /. unde sechzehen
jâr /. an sancte Jakobes âbende /
- 1,22 in den ernen
- 2,1 allen die disen brief sehent / oder hoerent lesen /. künde ich Heinrîch der
schultheize von Hûsen / ein burgær von Vrîburc /.
- 2,2 daz ich ze Hûsen in dem banne /. ein halbe jûcharten maten / lît / bî der
pfluocmaten /. unde ein jûcharten maten / lît ze dem
- 2,3 pfluocwege /. hân ze koufende gegeben /. den erbærn geistlichen vrouwen
/. der eppetissinne / unde dem convende / ze Güntherstal
- 2,4 bî Vrîburc / des ordenes von Citels /. umbe zehen pfunt pfenninge /
Brîsgöuwær /. unde bin ich der ganzliche von in gewert /. unde hân
- 2,5 ich in daz vore genante guot ûf gegeben ledicliche / ze ledigem eigene /.
unde hân ez wider von in entvungen /. mir unde mînen erben . ze
- 2,6 habende unde ze niezende / ze einem rechten erbe /. umbe vier mütte roggen
/ zinses / jærgelîches / ze sancte Martines messe / in dâ von
- 2,7 ze gebende /. unde swenne ez sich wandelt /. sô geben wir in einen kappen
ze êrschatze /. ich hân ouch gelobet / vûre mich / unde vûre alle
- 2,8 mîne erben unde nâchkomenden / den selben geistlichen vrouwen /. ire
/. unde aller ire nâchkomenden /. wer ze sînde /. des vore genanten
jærgelîchen
- 2,9 geltes /. in dem rehte also dâ vore geschriben stât / iemer mêr / gegen
allermannegelîchem / also reht ist /. her über ze einem urkünde /

- 2,10 ist dirre brieve / durh unser bete beidenthalp /. mit der burgær von Vrîburc
/ ingesigel besigelt / hier bî wâren dise geziuge .
- 2,11 hêrr Heinrich von Munzingen der burgermeistær /. hêrr Johannes der
Hovenlær /. Heinrich Môrhart /. pêter von Selden / Burchart
- 2,12 der Schoenmüllær /. der hase . unde ander êrbær liute genuoge . dirre
brieve wart gegeben /. ze Vrîburc /. in dem jâre . dô
- 2,13 man zalte / von gotes gebûrte /. driuzehen hundert jâr / unde sechzehen
jâr /. an unserre vrouwen âbende / der jungeren
- 3,1 wir /. abbet Gotevrit / unde der convent gemeinliche /. des goteshûses
ze sancte Pêter in dem Swarzwalde / in Konstanzær bischtuome /. sancte
Benedikten ordenes /.
- 3,2 tuon kunt / allen den / die disen brieve sehent / oder hoerent lesen /. daz wir
mit unser aller gemeinem unde einhelligem / râte / unde willen /. durch
unsers
- 3,3 goteshûses / nôtdurft unde nutz /. alliu diu guot /. acker /. maten /. holz
unde velt /. diu wir ze Teningen in dem dorfe unde in dem banne hatten /.
diu der Stûrmær
- 3,4 von uns / umbe drîzehen mütte roggen unde umbe drîzehen mütte gersten
/ jârgeliches zinses hatte /. swie / unde swâ siu dâ / gelegen / genennet /
oder geschaffen
- 3,5 sint /. siu sîn gebûwen / oder ungebûwen / âne alle geværde / haben ze
koufende gegeben unde ûf gegeben / ledicliche / ûzer unserre gewalt /.
Wernher ze dem adelar /.
- 3,6 dem wînschen / einem burgær von Vrîburc / in sîne gewalt / unde in
sîne nützlich gewer /. ime / unde allen sînen erben unde nâchkomenden
/ êwiclîche / ze besitzende / ze
- 3,7 habende / unde ze niezende / vûre ledic eigen /. umbe drîe unde zweinzic
marke / silbers loetiges Vrîburgær gewæges / unde sîn wir des selben silbers
ganzliche von ime
- 3,8 gewert /. unde haben ez in unsern unde unsers goteshûses / gemeinen
nôtdürftigen nutz unde vromen bekêret /. wir haben ouch gelobet / vûre
uns / unde vûre alle unser
- 3,9 nâchkomenden /. unde vûre unser goteshûs /. dem vore genanten Wernher
/ sîn / unde aller sîner erben / unde nâchkomenden .. wer ze sînde / der
vore genanten guote /. in dem
- 3,10 rehte also dâ vore geschriben stât /. an allen den steten dâ siu sîn bedürftent
/ iemer mêr / gegen allermannegelîchem also reht ist /. wir haben ouch
gelobet / vûre uns / unde
- 3,11 vûre alle unser nâchkomenden / unde vûre unser goteshûs / mit guoten
triuwen /. disen vore genanten kouf unde diz dinc stæte ze habende / unde
niemer dâ wider ze komende
- 3,12 noch ze tuonde / mit geistlichem noch mit wereltlichem gerihte / noch âne
gerihte mit worten noch mit werken dechein wîse / âne alle geværde wir
verzîhen
- 3,13 uns ouch / vûre uns / unde vûre alle unser nâchkomenden /. unde vûre
unser goteshûs .. alles rehtes unde gerihtes / geistliches / unde wereltliches
/ unde aller der dinge . dâ mite wir /

- 3,14 oder ieman von unseren wegen /. nû / oder her nâch /. iutesiut möhten
getuon lützel / oder vile / wider diz vore geschriben dinc / mit Worten /
oder mit werken / dechein
- 3,15 wîse âne alle geværde /. unde hân wir diz vore geschriben dinc getân /. mit
willen unde mit gehellunge /. der edeln unserre hêrren / grâven Ègens von
Vrîburc / unsers
- 3,16 vogetes / unde grâven Kuonrâtes sînes sunes / hêrren von Vrîburc /. her
über ze einem urkünde / unde daz diz vore geschriben dinc alles wâr unde
stæte belîbe /. sô ist dirre
- 3,17 brief / mit unseren des vore genanten abbetes unde des vore genanten
convendes ingesigelen /. unde durch unser bete beidenthalp / ze einem
urkünde /. mit unserer
- 3,18 vore genanten hêrren / ingesigelen / besigelt /. wir / die vore genanten
hêrren /. grâve Ègen unde grâve Kuonrât sîn sun / hêrre ze Vrîburc ..
verjehen in disem brieve . daz diz
- 3,19 vore geschriben ... dinc / mit unser beider willen unde gehellunge /
geschehen ist / unde geloben ouch dâ wider niemer ze komende / noch
ze tuonde / mit Worten noch mit werken
- 3,20 dechein wîse . her über ze einem urkünde /. sô hân wir durh ire bete
beidenthalp / unser beider ingesigele / ouch gehenket / an disen brief ..
hier bî wâren / dise geziuge /.
- 3,21 hêrr Johannes der prior /. hêrr Johannes der kamerær /. hêrr Johannes der
kustær hêrr Kuonrât der kellær .. hêrr Gotevrit von Lôtschenbach /. vinke
/. Burchart der Schoenmüllær ..
- 3,22 Pêter von Selden /. unde ander êrbær liute genuoge . dirre brief wart
gegeben / ze sancte Pêter in dem jâre dô man zalte / von gotes gebûrte
/. driuzehen
- 3,23 hundert jâr / unde sechzehen jâr /. an der einlif tûsent megede tage
- 4,1 wir / bruoder Herman / von Hachberc /. kommentiur / unde die bruodere
gemeinliche /. sancte Johanneses ordenes / spitâls von Jerusalem /. des
hûses ze Vrîburc
- 4,2 in Brîsgöuwe /. tuon kunt allen die disen brief sehent / oder hoerent lesen
/. daz wir / mit unser aller gemeinem râte / unde einhelligem willen /. ein
pfunt / pfenninge / gewonêlicher Brîsgöuwær / geltes / jærgelîches / ze
sancte Martines messe rehtes zinses /. von unserm orthûse /. daz des
Brennærs was /. daz
- 4,4 lît in der Niuwenburc /. vore des .. Kîchenden hûse über /. von dem vordern
hûse unde swaz dâr zuo hoeret /. âne daz hinderhûs / âne alle geværde /.
- 4,5 haben ze koufende gegeben /. der êrbæren vrouwen /. vern Elisebêten von
Munzingen / vore sancte Niklawese über / einer burgerinnen von Vrîburc
/.
- 4,6 vûre ledic eigen / nâch der hêrscheft rehte von Vrîburc /. umbe vûnf marke
/ silbers / loetiges Vrîburgær gewæges /. unde sîn wir / des selben silbers
- 4,7 ganzlîche von ir gewert /. unde haben ez in unsers vore genanten hûses
nutz unde vromen bekêret / unde sûlen wir daz selbe gelt / jærgelîches / ze

- 4,8 sancte Martines messe geben / bruoder Kuonrâte von Snellingen ze
Tennebach / irem sune /. unde sülen wir ez jærgeliches an sîner stat /
entwerten / Oswalte
- 4,9 von Tottinchoven / unde Niklawese Æderlîn / ze einem rechten lîpgedinge
/. alle die wîle der selbe / bruoder Kuonrât lebet /. unde swenne er erstirbet
/.
- 4,10 sô ist uns / daz selbe jærgelich gelt / êwelîche ledic unde gevallen /. unde
sülen wir unde alle unser nâchkomenden / nâch sînem tôde /. iemer mêr /
êwiclîche /.
- 4,11 jærgeliches / an sancte Ambrosien tage /. in dem aberellen /. Hugēs sæligen
von Munzingen / der vore genanten vrouwen sunes / jârgezît / mit dem
selben pfunde
- 4,12 pfennincgeltes / innewentic ahte tagen den næhesten vore dem jârgezîte .
oder innewentic ahte tagen den næhesten / nâch dem jârgezîte / in unserme
4,13 convende / über unsern tisch . begân /. über daz / daz man uns âne daz
denne gewonelîche geben sölte âne alle geværde /. und swenne wir
4,14 daz selbe jârgezît / versitzen / ahte ganze tage / nâch dem jârgezîte . sô
vellet daz pfunt pfenninge / des jâres / dem spitâle / des heiligen
4,15 geistes / ze Vrîburc /. her über ze einem wâren urkunde /. unde ze
einer êwigen bestætigungē / sô hân wir unseriu des vore genanten /
kommentiuers /.
- 4,16 und des vore genanten hûses ingesigele / gehenket an disen gegenwertigen
briev /. hier bî wâren dise geziuge /. bruoder .. Sigebote .
- 4,17 der prîor /. bruoder Wernher von Stoufen /. bruoder Heinrîch von Rotwîl
/ priesterē . bruoder Heinrîch der zilige /. kellær /. bruoder Johannes
4,18 der Nidinger schaffenær /. bruodere / sancte Johanneses ordenes /. des vore
genanten hûses /. hêrr Johannes von Kûrnegge / ein ritter /. Heinrîch
4,19 meier Niezzē /. Niklawes von Tûselingen /. Pêter von Selden /. unde
ander êrbær liute genuoge . dirre briev wart gegeben / in dem vore
4,20 genantem hûse . in dem jâre . dô man zalte / von gotes gebûrte /. driuzehen
hundert jâr /. unde sibenzehen jâr /. an sancte Ambrosien tage /. in dem
4,21 aberellen
- 5,1 allen die disen briev sehent / oder hoerent lesen /. kûnde ich Gêrtrût von
Pherre / ein burgærinne von Vrîburc /.
- 5,2 daz ich lûterlîche durch got / unde durch mîner unde mîner vorderen sêlen
heil /. hân gegeben / unde ûf gegeben /
- 5,3 lediclîche / von der hant / ûzer mîner gewalt /. den êrbæren geistlîchen
hêrrē /. dem abbete / unde dem convende .
- 5,4 ze Tennebach / in Konstenzær bischtuome /. des ordenes von Zitels /. die
vier jûchart ackers / die ich
- 5,5 hatte / unde mîn wâren / die dâ ligent bî Vrîburc in irem velde / vore dem
rôtloube / underhalb der
- 5,6 steinmûren / dâ von si mir jærgeliches vûnf mûtte roggē ze zinse gâben /.
in / unde allen iren nâchkomenden /
- 5,7 die selben ackere /. êwiclîche ze besitzende /. ze habende / unde ze niezende
/. ze einem almuosene /. und

- 5,8 sülen si iemer mêr / jærgelîches / des künînges zins / von den selben ackeren
verrehtigen / unde geben /. ich
- 5,9 hân mich ouch verzigen / lûterlîche / unde lediclîche / vûre mich / unde
vûre alle mîne erben unde nâchkomenden /. gegen
- 5,10 den vore genanten geistlîchen hêrren /. unde gegen allen iren
nâchkomenden / alles des rehtes / sô ich – an
- 5,11 den vore genanten ackern / unde an den vore genanten vûnf mûtten geltes
hatte /. unde sagen siu des selben geltes
- 5,12 êwiclîche ledic / mit guoten triuwen âne alle gevârde . her über ze einem
urkûnde / ist dirre
- 5,13 brief durch unser bete / beidenthalp / mit der êrbærn rittere . hêrrn
Heinrîches von Munzingen / des burgermeistærs /
- 5,14 unde hêrrn Snêwelînes Bernlapes des schultheizen / ingesigelen / besigelt
/. unde wir die vore
- 5,15 genanten rittere /. haben durch der vore genanten beider teile bete / unseriu
ingesigele / gehenket an
- 5,16 disen brief / ze einem urkûnde / dises vore geschribenen dinges /. hier bî
wâren dise geziuge / hêrr Wernher
- 5,17 von Buochheim der pfaffe /. Johannes der wîze sûtær /. Pêter von Selden /.
Niklawes Rinderlîn /.
- 5,18 Johannes der Malterær /. unde ander êrbær liute genuoge /. dirre brief wart
gegeben / ze Vrîburc /.
- 5,19 in dem jâre /. dô man zalte von gotes gebûrte / driuzehen hundert jâr .
unde sibenzehen jâr /. an dem nâchsten
- 5,20 mæntage / nâch ûz gênter ôsterwochen
- 6,1 allen die disen brief sehent oder hoerent lesen /. kûnde ich Johannes
Küechelî von Vrîburc /. dem man sprichet / “der Üger ..” daz ich alliu
diu guot / unde gelte diu mîn lêhen wâren / diu ich êmâls hatte .. unde diu
mich von
- 6,2 mînem hêrren / mîner swester manne / hêrrn Johannese Köppelîn sæligen
an gevallen sint .. hân verlihen / hêrrn Heinrîche von Munzingen /. unde
hêrrn Johannese von Munzingen / dem râmener .. ritteren . von Vrîburc /.
diu selben lêhen / mit
- 6,3 mir ze habende unde ze niezende /. ze rehtem lêhen /. unde sint diz diu
guot / unde gelte / diu êmâls mîniu lêhen sint gewesen /. ein vierteil des
zehenden / ze Hûsen bî Biengen /.. unde ze Hartheim ze dem Bœumelîn /
ein zehenteil /..
- 6,4 unde ze Eschebach bî Heitersheim . sechzehn mütte korngeltes /.. unde
ze Haselah ein halbiu huobe /. daz allez ist lêhen / von der hêrschaft von
Vrîburc /. unde ze Merdingen / sibenzehen mütte korngeltes /. unde vier
mütte haberngeltes .. und
- 6,5 vierzehn schillinge pfennîngeltes .. daz allez / ist lêhen von junchêrren
Wernher von Stoufen /.... unde ze Opfingen / zehen mütte roggengeltes
von einer mûle /.. unde ze Vrîburc / zehen schillinge pfennîngeltes von
der münze /.

- 6,6 diu beidiu sint lêhen . von junchêrren Heinrîche / marcgrâven Ruodolves
sæligen sune von Hachberc ... unde diu vogeteie ze Schelei über liute unde
über guot /. diu ist lêhen von hêrrn Walther Brögelin von Gêroldsegge ...
und
- 6,7 ze Oberenbergen unde ze Vockesberc . ein huobe / diu giltet / jærgelîches /
ein vuoder wînes /. unde niun sester roggen /. diu ist lêhen von hêrrn
Burcharte von Üsenberc .. unde ze Wülptal siben lêhen / diu geltent
jærgelîches /.
- 6,8 vier pfunt pfenninge / diu sint lêhen von dem herzogen von Tecke /. wolte
aber ich / mit disen vore genanten lêhen / diu êmâls mîn sint gewesen /
ihtesiht tuon / ich sî gesunt / oder siech /. oder an dem tôtbette / alle die
wîle ich leben /.
- 6,9 des sûlen mich die vore genanten rittere . hêrr Heinrîch / unde hêrr
Johannes von Munzingen / noch ire erben / niut irren / dechein wîse /
âne alle geværde /. wolten aber siu / diu selben lêhen behaben / sô sûlen
siu geben / vûnvzic marke /. unde hundert
- 6,10 marke / silbers / loetiges / Vrîburgær gewæges swar ich wile /. unde swar
ich daz selbe silber heize geben / si sîn gegenwertic / oder niut / dar sûlen
siu / oder ire erben ob si ein wâren . daz selbe silber ganzlîche geben mit
guoten
- 6,11 triuwen âne alle geværde /. sô sint diz diu lêhen diu mich von mînem vore
genantem hêrrn sæligen / hêrrn Köppelîn / an gevallen sint /. diu ich ouch
den vore genanten zwein ritteren / mit mir ze rehtem lêhen verluhen hân /.
6,12 diu vogeteie ze Mershûsen / diu ist lêhen von der hêrschaft von Vrîburc
/.. unde die zehenden /. ze Mershûsen /. ze Ouwe . ze Horwen /. unde
ze Güntherstal /. die sint lêhen von mîner vrouwen /. von Wartenberc /.
grâven Heinrîches sæligen vrouwen /.
- 6,13 unde diu vogeteie ze Vröulenbach / ûf sancte Blâsins guote /. der ist vier
pfunt pfennincgeltes /. diu ist lêhen von dem rîche /.. unde ze Mershûsen
ein halbe hov /. unde ein holz /.. unde ze Ühtingen ein zehende /. diu sint
lêhen von hêrrn
- 6,14 Burcharte von Üsenberc . her über ze einem urkûnde . unde daz diz vore
geschriben dinc wâr / unde stæte belîbe /. sô hân ich / der vore genante
Johannes Kûechelî / mîn ingesigel gehenket an disen brieve / unde wir die
vore genanten
- 6,15 rittere . verjehen wârheit dises vore geschribenen dinges /. unde swaz dâ
vore von uns geschriben stât / daz geloben wir vûre uns / unde vûre unser
erben unde nâchkomenden stæte ze habende mit guoten triuwen / âne alle
geværde /. her über
- 6,16 ze einem urkûnde . unde daz diz wâr unde stæte belîbe / sô hân wir unser
beider ingesigele / ouch gehenket an disen brieve /. hier bî wâren dise geziuge
/ hêrr Snêwelî in dem hove / der burgermeistær /. hêrr Êgelolv Kûechelî /.
hêrr Kuonrât
- 6,17 Dietrîch Snêwelî . hêrr Lanze von Valkenstein /. hêrr Johannes Kûechelî
/. unde ander êrbær liute genuoge /. diz geschach / unde wart dirre brieve
gegeben / ze Vrîburc / in dem jâre . dô man zalte / von gotes gebûrte .
6,18 driuzehen hundert jâr /. unde sibenzehen jâr . an der nâhesten
mittewochen / vore sancte Margareten tage

- 7,1 wir . Katharina von Stoffeln / von gotes genâden eppetissinne /
des goteshûses / ze sancte Margareten / ze Waltkirche in Konstenzær
bischtuome /. unde daz
- 7,2 kapitel gemeinliche /. des selben goteshûses /. tuon kunt / allen / die disen
briev sehent / oder hoerent lesen /. daz wir einhellicliche . den halben
zehenden /
- 7,3 an dem Slierberge bi Vrîburc /. der hêrrn Kuonrâtes Snêwelînes sæligen
in dem hove erbe was / alse wir vernomen haben .. umbe vûnf schillinge
pfenninge /.
- 7,4 jærgeliches zinses /. haben verlihen /. Johannese von Valkenstein /. Ruomes
sæligen sune /. einem burgær von Vrîburc /. ime /. unde allen sînen erben
/ unde
- 7,5 nâchkomenden / êwiclîche ze habende / unde ze niezende / ze einem rechten
erbe . umbe vûnf schillinge / pfenninge / gewonelicher Brîsgöuwær / zinses
/ jærgeliches /.
- 7,6 ze sancte Margareten messe /. uns / unde allen unseren nâchkomenden /
êwiclîche dâ von ze gebende /. unde swenne ez sich wandelt .. sô gebent si
vûnf
- 7,7 schillinge pfenninge / gewonelicher Brîsgöuwær ze êrschatze /. her über ze
einem wâren urkunde / unde ze einer êwigen bestætigung / sô hân wir /
diu
- 7,8 vore genante eppetissinne /. unde daz vore genante kapitel / unseriu
ingesigele / gehenket / an disen / gegenwertigen briev /. hier bi wâren
dise geziuge / hêrr
- 7,9 Johannes Snêwelî / kirchhêrr ze Riute /. hêrr Huc von Inmendingen /
kirchhêrr ze Iuringen /. hêrr Snêwelî in dem hove /. hêrr Snêwelî Bernlape
/. hêrr
- 7,10 Kuonrât Dietrîch Snêwelî / rittere /. Walther von Valkenstein /
Hiltebrandes sæligen sun /. Snêwelî in dem hove . Niklawes Æderlî /.
Tegge /. Pêter von
- 7,11 Selden /. unde ander êrbær liute genuoge /. dirre briev wart gegeben / ze
Vrîburc /. in dem jâre . dô man zalte / von gotes gebûrte /. driuzehen
hundert
- 7,12 jâr /. unde sibenzehen jâr /. an sancte Margareten âbende
- 8,1 allen den / die disen briev sehent / oder hoerent lesen /. kûnde ich Niklawes
von Tûselingen / ein burgær von Vrîburc /. daz ich daz guot unde daz gelt
ganzliche / daz ich ze
- 8,2 Ouwe / bi Vrîburc hatte / daz mir mîn sweher Albreht Spoerlîn /. ze sîner
tochter / Angnesen mîner êlîchen wirtinnen gap /. daz hier nâch an disem
brieve geschriben stât /. hân ze koufende
- 8,3 gegeben / unde ûf gegeben /. ledicliche . den êrbæren geistlichen vrouwen
/ der eppetissinnen /. unde dem convende / der klôstervrouwen ze
Güntherstal / bi Vrîburc /. des ordenes von Citels / burgerinnen
- 8,4 ze Vrîburc /. in / unde allen iren nâchkomenden / êwiclîche ze habende
unde ze niezende / vûre ledic eigen /. umbe einen vierdunc / unde ein marc
/ unde vierzic marke . silbers / loetiges /. Vrîburgær

- 8,5 gewæges /. unde bin ich des selben silbers / ganzlîche von in gewert /. unde ist diz daz guot / unde daz gelt /. daz ich in alse ze koufende hân gegeben /. unde lît ze Ouwe / bî Vrîburc /. Weltîn der kamerær / gît
- 8,6 vier schillinge pfenninge / von dem Schalun acker / ze zinse . unde ze erene sehs pfenninge .. Elli diu mûlenærinne gît einen schillinc pfenninge unde ein huon / ze Wazzerschaffen / von dem mettelîne /. unde ze erene
- 8,7 ein huon /.. Werlîn Swende gît drittehalben schillinc / unde ein pfunt pfenninge / unde einen kappen / unde ein huon /. unde ze erene zwêne schillinge pfenninge /. und ein pfunt pfenninge ze einem abezuge tôt / alder
- 8,8 lebende /. von dem guote in Vinsterenbach /.. Kuonrât Swende gît sibenzehen schillinge pfenninge . unde einen kappen / unde ein huon /. unde ze erene zwêne schillinge pfenninge . unde ein pfunt pfenninge ze einen
- 8,9 abezuge / tôt / oder lebende /. von dem guote in Vinsterenbach /.. Uli der kamerær gît sehs schillinge pfenninge /. unde ze erene ein huon / von dem ackere / in Wîtenegge /. der selbe / gît ouch zwêne schillinge
- 8,10 pfenninge / von der maten in Ebersbach /. unde ze erene ein huon /.. Spæte gît drîzic schillinge pfenninge /. von sînem boumgarten /. unde gît ze erene vûnf schillinge pfenninge .. der selbe gît ouch sibenzehen schillinge
- 8,11 pfenninge . unde zwêne kappen /. von Kalcmaten /. unde ze erene zwêne kappen /.. diu Rætîn gît niun schillinge pfenninge / von dem hûse / unde von dem boumgarten /. unde ze erene vûnftehalben schillinc pfenninge /
- 8,12 diu selbe Rætîn gît ouch zehen schillinge pfenninge / von dem reben /. unde ze erene zwêne kappen /.. der gûrtelær gît vierzehen schillinge pfenninge /. unde ze erene vier schillinge pfenninge .. unde diu Swæblîn
- 8,13 gît einen schillinc pfenninge . von den selben reben /.. diu Hessîn gît / vûnvzehen schillinge pfenninge /. unde ze erene zwêne kappen /.. diu Roetîn gît drîe schillinge pfenninge / von einem mettelîne
- 8,14 in dem nidern Ezzental /. unde ze erene ein huon /.. Heini Swæblîn gît einen schillinc pfenninge / unde ein huon /. von dem hûse bî der linden /. unde zwei hûenere von der Biunten /.. diu Swæblîn gît sehs
- 8,15 schillinge pfenninge / von dem Schoeneberge /. unde ze erene ein huon /.. Bertschi der Hoehinger gît zwêne schillinge pfenninge von dem Schoeneberc /. unde ze erene ein huon /.. Herman Öribach / gît zwêne
- 8,16 schillinge pfenninge / von dem Swîneberge / unde ze erene ein huon /.. der graser gît sehs pfenninge / von einem acker stoezet an sînen garten /.. Albers sun gît zwêne schillinge pfenninge / unde einen kappen /.
- 8,17 von der maten in dem Wolvestal /. unde gît einen kappen ze erene /.. unde .. Hoezelîn gît zwêne schillinge pfenninge /. ich / der vore genante / Niklawes von Tûselingen / hân ouch gelobet / vûre mich / unde vûre
- 8,18 alle mîne erben unde nâchkomenden /. den vore genanten geistlîchen vrouwen /. ire / unde aller ire nâchkomenden / wer ze sînde des vore genanten guotes / unde geltes / in dem rehte alse dâ vore geschriben stât / iemer mêr
- 8,19 gegen allermannegêlichem alse reht ist /. her über ze einem wâren urkûnde /. unde ze einer êwigen bestâtigunge /. sô ist dirre briev / mit mînem ingesigel /. unde durch unser bete . beidenthalp ze einem urkûnde /

- 8,20 mit der burgær von Vrîburc ingesigel /. unde mit mînes swehers Albrehtes Spoerlînes / ingesigel / besigelt /. unde wir der burgermeistær / unde der rât / von Vrîburc .. haben unsere gemeinede ingesigel /
- 8,21 unde ich Albreht Spoerlîn hân mîn ingesigel . durh ire bete beidenthalp / gehenket an disen brieve / ze einem urkünde / dises vore geschribenen dinges /. hier bî wâren dise geziuge . hêrr Snêwelî in dem hove / der burgermeistær /.
- 8,22 hêrr Heinrîch von Munzingen / rittere . Meinwart / unde Gotevrit von Tottinchoven /. Johannes von Munzingen . hêrrn Heinrîches sun /. Klâwes Æderlî /. Berhtolt von Kölne . unde ander êrbær liute genuoge . dirre brieve wart gegeben /. ze Vrîburc in dem jâre / dô man zalte / von gotes gebürte /. driuzehen hundert jâr /. unde sibenzehen jâr /. an sancte Lucien âbende
- 9,1 wir / abbet Dietmâr / unde der convent gemeinliche / ze sancte Marien zelle in dem Swarzwalde / in Konstenzær bischtuome /. sancte Augustinus ordenes /. tuon kunt allen die disen brieve sehent / oder hoerent lesen .. daz wir / mite unser aller gemeinem râte / und
- 9,2 einhelligem willen / durch unser nôtdurft unde nutz .. drîzic mütte roggengeldes / jærgeliches / entzwischen den zwein messen / unserre vrouwen tagen der / êrren unde der jungeren rehtes zinses . von unserem hove ze Walthershoven .. dâ meier Berhtolt
- 9,3 Reingêr ûfe sezhaften ist /. unde von allem dem guote / sô zuo dem selben hove hoeret .. swie / unde swâ ez dâ / gelegen / genemmet / oder geschaffen ist / âne alle geværde . bî dem bezzisten roggem sô jærgeliches ûf dem selben guote wirdet . âne aller geværde /. haben ze koufende /
- 9,4 gegeben /. Johannes dem wîzen sûtære / einem burgære von Vrîburc .. ime unde sînen erben unde nâchkomenden /. daz selbe jærgelich gelt /. ze besitzende /. ze habende unde ze niezende / vûre uns / vûre ledic eigen /. umbe vierzic marke silbers / loetiges /
- 9,5 Vrîburgær gewæges / unde sîn wir des selben silbers ganzliche von ime gewert .. unde haben ez in unsern unde unsers goteshûses / gemeinen / nôtdürftigen nutz / unde vrûmen bekêret .. unde hât er uns die genâde / unde die vriuntschaft getân .. swenne wir / oder
- 9,6 unser nâchkomenden ob wir en wæren / ime / oder sînen erben oder nâchkomenden ob er en wære / geben samenthaft .. vierzic marke / silbers / loetiges / Vrîburgær gewæges / innewentic niun jâren den nâhesten nâch einander diu an vâhent / hiute dises tages / dô dirre
- 9,7 brieve gegeben wart /. vore der lichtmesse / âne den künftigen nutz des jâres /. oder nâch der lichtmesse . mit dem künftigen nutze des jâres /. sô sûlen si uns daz selbe jærgelich gelt / umbe daz selbe silber wider ze koufende geben /. koufen aber wir daz selbe
- 9,8 jærgelich gelt / niut alsô wider innewentic dem vore genanten zile /. sô sûlen ez der vore genante Johannes der wîze sûtær /. unde alle sîne erben unde nâchkomenden / êwicliche haben unde niezen / unde sûlen uns enkeines widerkoufes mêr dâr umbe gebunden

- 9,9 noch haft sîn / unde swenne ez sich wandelt / sô geben wir in zwêne kappen
ze êrschatze /. wir haben ouch gelobet / vüre uns unde vüre alle unser
nâchkomenden / unde vüre unser goteshûs . dem selben Johanneſe dem
wîzen sûtære /. sîn / unde aller sîner erben
- 9,10 unde nâchkomenden / wer ze sînde des vore genanten jârgelîchen geltes /
in dem rehte also dâ vore geschriben stât / gegen allermannegeîchem also
reht ist /. wir haben ouch gelobet unde geloben mit disem brieve . vüre uns
/ unde vüre alle unser nâchkomenden /. unde vüre
- 9,11 unser goteshûs / mit guoten triuwen / disen vore genanten kouf unde diz
dinc stæte ze habende . unde niemer dâ wider ze komende noch ze tuonde
/ mit geistlîchem noch mit wereltlîchem / gerihte / noch âne gerihte . mit
worten noch mit werken dechein wîse / âne
- 9,12 alle geværde . wir haben uns ouch verzigen offenlîche / aller der dinge / dâ
mite wir / oder unser nâchkomenden / oder ieman von unseren wegen /
hier wider / dechein dinc möhten getuon . nû . oder her nâch . lützel oder
vile . mit worten oder mit werken / dechein wîse /
- 9,13 âne alle geværde /. her über ze einem urkünde . unde daz diz vore geschriben
dinc allez wâr / unde stæte belîbe /. sô hân wir der vore genante abbet
/ unser ingesigel unde wir der vore genante convent unser ingesigel ..
gehenket an disen gegenwertigen
- 9,14 brieve /. hier bî wâren dise geziuge . Ruodolv von Ouwe der junge /.
Henzman von Vürstenberc . Berhtolt Vinke /. Johannes Hache /. Gotevrit
von Tüengen /. Pêter von Selden /. unde ander êrbær liute genuoge . diz
geschach / unde wart dirre
- 9,15 brieve . gegeben / in dem vore genantem goteshûse / in dem jâre /. dô man
zalte / von gotes gebûrte /. driuzehen hundert jâr / unde ahtzehen jâr /. an
sancte Valentînes tage
- 10,1 allen den die disen brieve sehent / oder hoerent lesen .. künde ich Uolrîch /
der vrîe von Eistat / ein ritter .. daz ich die erbeschaft / unde allez daz reht
ganzlîche /. daz ich hatte /. an dem hove / ze
- 10,2 Eistat /. dem man sprichet des von Hûsen hov /. der hêrrn Hessen / unde
hêrrn Ruodolfes sæligen von Ūsenberc was /. der dâ lît neben mînem hove
/. unde an allem dem guote / unde gelte sô zuo dem selben
- 10,3 hove hoeret /. swie / unde swâ ez dâ gelegen /. genemmet / oder geschaffen
ist /. ez sî gebûwen / oder ungebûwen / âne alle geværde /. ackere /. maten
.. holz .. velt /. zinse . wünne . unde weide /. dâ
- 10,4 von ich Niklawese Æderlîn ze einem erbe . jârgelîches / vier / unde ahtzic
mütte / der vier korne / ze zinse gap .. hân ze koufende . gegeben / unde
ûf gegeben / eigenlîche /. unde lediclîche . dem selben ..
- 10,5 Niklawese / Æderlîn /. einem burgær von Vrîburc .. ime /. unde allen sînen
erben / unde nâchkomenden / êwiclîche /. ze habende / unde ze niezende
. umbe drîe unde zweinzic marke / silbers . loetiges / Vrîburgær
- 10,6 gewæges /. unde bin ich des selben silbers ganzlîche von ime gewert /. ich
hân mich ouch verzigen offenlîche . vüre mich / unde vüre alle mîne erben
/ unde nâchkomenden .. lûterlîche /. unde lediclîche /. alles

- 10,7 des rehtes /. unde der erbeschafte /. sô ich an dem vore genantem hove /. unde swaz dâr zuo hoeret . hatte / oder haben mohte / âne alle geværde / ich hân ouch gelobet / vüre mich / unde vüre alle mîne erben / unde
- 10,8 nâchkomenden /. dem vore genantem Niklawese Æderlîn /. sîn /. unde aller sîner erben / unde nâchkomenden /. wer ze sînde /. dises vore geschribenen koufes / unde dises dinges / in dem rehte /. alse . dâ vore geschriben
- 10,9 stât . iemer mêt / gegen allermannegelîchem / alse reht ist .. ich hân ouch gelobet mit guoten triuwen / diz vore geschriben dinc stæte ze habende / unde niemer dâ wider ze komende / noch ze tuonde / mit geistlîchem /
- 10,10 noch mit wereltlîchem gerihte /. noch âne gerihte /. mit worten noch mit werken dechein wîse / âne alle geværde /. her über ze einem urkünde /. unde daz diz vore geschriben dinc / wâr unde
- 10,11 stæte belîbe /. sô hân ich mîn ingesigel gehenket an disen brief .. unde ich Ruodolv von Eistat / mînes vore genanten hêrren /. hêrrn Uolrîches . von Eistat sun / verjihe offenkliche an disem brieve /.
- 10,12 daz dirre vore genante kouf unde diz dinc / mit mînem guotem willen unde gehellunge geschehen ist . ich hân ouch dem vore genantem Niklawese Æderlîn ûf gegeben ledicliche /. die erbeschafft /. unde
- 10,13 ouch daz gelt / unde allez daz reht ganzliche /. daz ich an dem vore genantem hove /. unde swaz dâr zuo hoeret / hatte / oder haben mohte /. unde hân mich verzigen lûterliche unde offenkliche /. alles des rehtes / sô ich
- 10,14 dâr an hatte /. mit guoten triuwen âne alle geværde . ich hân ouch gelobet mit guoten triuwen disen vore genanten kouf unde diz dinc / stæte ze habende /. unde niemer dâ wider ze komende noch ze tuonde /
- 10,15 mit geistlîchem noch mit wereltlîchem gerihte /. noch âne gerihte / mit worten / noch mit werken / dechein wîse . âne alle geværde . her über ze einem urkünde . unde daz diz allez / alse dâ vore
- 10,16 von mir geschriben stât / wâr / unde stæte belîbe . sô hân ich mîn ingesigel ouch gehenket an disen brief /. hier bî wâren dise geziuge /. hêrr Snêwelî in dem hove der burgermeistær /. Ruolant .. Oswalt von
- 10,17 Tottinchoven .. Kuonrât Geben .. Uolrîch Famel .. Kuonrât der havenær . der halber .. Johannes Bitrolf .. Berhtolt Slegellîn /. Burchart der wambeiser .. Jakop Eigel . Kuonrât der Faber .. und
- 10,18 ander êrbær liute genuoge /. diz geschach unde wart dirre brief gegeben / ze Vrîburc .. in dem jâre .. dô man zalte / von gotes gebûrte /. driuzehen hundert jâr . unde ahtzehen jâr /. an dem
- 10,19 nâhesten mæntage /. nâch sancte Valentînes tage
- 11,1 ich marcgrâve Heinrîch von Hachberc / tuon kunt / allen die disen brief sehent / oder hoerent
- 11,2 lesen /. daz ich die hovestat / unde den wîwær .. die mîn wâren /. die dâ ligent / entzwischen
- 11,3 Hachberc unde Enmettingen / unde swaz zuo der selben hovestat / unde zuo dem wîwær
- 11,4 hoeret /. hân gegeben ledicliche . mînem bruodere . bruoder Hermanne von Hachberc

- 11,5 beidiu durch sîne liebe unde ouch durch got / wan er in sancte Johannes ordene / in geistlîchem
- 11,6 lebende ist /. ime / die selbe hovestat /. unde den wîwær / ze habende / unde ze niezende
- 11,7 eigenlîche / alle die wîle er lebet /. unde swenne er en ist / unde got über in gebiutet
- 11,8 sô sint diu vore genante hovestat / unde der wîwær / unde daz dâr zuo hoeret /. dem ordene
- 11,9 sancte Johanneses / êwiclîche ledic unde gevallen /. durch mîner / unde mîner vorderen sêlen heil /
- 11,10 unde hân ich / noch mîne erben / noch mîne nâchkomenden / niut dâ mite ze schaffende noch
- 11,11 ze tuonde . her über ze einem urkûnde / unde daz diz wâr / unde stæte belîbe /. sô hân ich
- 11,12 mîn ingesigel / gehenket / an disen brieve /. diz geschach / unde wart dirre brieve gegeben /
- 11,13 ze Hachberc / in dem jâre / dô man zalte / von gotes gebûrte . driuzehen hundert jâr /
- 11,14 unde ahtzehen jâr /. an dem nâhesten zîstage / vore sancte Mathias tage
- 12,1 wir / von gotes genâden abbet Dietmâr / von sancte Marîen zelle / in dem Swarzwâlde / in Konstanzær bischtuome .. sancte Augustinus ordenes .. unde wir bruoder Johannes von Valkenstein / kommentiu .. unde die bruodere
- 12,2 gemeinlîche / unserre vrouwen sancte Marîen ordenes /. der diutischen bruoder ordenes des hûses ze Vrîburc in Brîsgöuwe /. unde wir / Snêwelî .. hêrrn Johannes Snêwelînes sæligen sun /. unde Johannes Kolman / von Vrîburc /. und
- 12,3 wir die liute alle gemeinlîche /. der gebûrsamenen der dörfær .. ze Walthershoven .. ze Merdingen .. ze Harthûsen .. unde ze Wasenwîler .. tuon kunt allen den . die disen brieve an sehent / oder hoerent lesen . daz
- 12,4 wir / mit unser aller gemeinem râte /. unde einhelligem willen / lieplîche . unde guotlîche / mit einander überein sint komen /. umbe die missehellige /. sô wir wider einander hatten / umbe daz riet / daz dâ lît
- 12,5 entzwischen Üringen . unde Gottenheim /. unde Wasenwîler / unde Merdingen /. also .. daz wir alle sament einhelliclîche / die selbe missehellige /. williclîche haben gesetzt / unde gelâzen / an die drîzehen manne / die hier
- 12,6 nâch geschriben stânt / dâr zuo sint den selben drîzehenen / gegeben / dise nâch geschribenen vier manne / ze râte / unde ze helfærn / den underganc / ze wîsende / unde ze lêrende . bescheidenlîche /. bî iren eiden / die si dâr
- 12,7 umbe / ze den heiligen gesworen hânt /. der nâmen die von Merdingen / Kuonrâten Rueblîn den mûllenær .. unde Heinrîchen den zehendenær / von Wasenwîler /. dô nâmen die von Wasenwîler / Johannesen den voget / dem man

- 12,8 spricht von Herinheim / unde Johannesen den karrer / von Merdingen / swie die vore genanten drîzehene / mit der vore genanten vierer râte / daz riet / undergangen / unde unterscheiden / daz wir daz alle stæte
- 12,9 sûlen haben /. unde sint diz die drîzehene /. von Uiringen / Kuonrât der schultheize / unde Kuonrât der wînman /. unde von Gündelingen / Burchart der Ebringær .. Uolrîch der Harthûsær .. Johannes der glasær .. unde Wernher
- 12,10 der listær .. unde von Gottenheim .. Gêrunc Bûtîn Berhtolt der Isenîn .. Kuonrât der küniger .. unde Guotliep der voget /. unde von Bezzingen / Wernher .. von Elzach .. unde von Schafhûsen / Herman der meier /
- 12,11 unde Heinrîch Vögellîn .. unde sint die vore genanten drîzehen manne /. ûf dem vore genanten riete gegangen /. unde hânt daz selbe riet / einhellicliche / mit der vore genanten / vier manne râte / unde lêre / die
- 12,12 ouch dâ gegenwertic wâren /. under gangen /. ûz gerichtet /. unde unterscheiden .. bî iren eiden / die si ouch dâr umbe ze den heiligen gesworen hânt /. alse diu lâchen nû / gemachet / unde gesetzet sint / diu ûf
- 12,13 dem selben riete stânt /. unde swaz des rietes jenent den lâchenen / gegen Wasenwîler ist /. daz sûlen die von Wasenwîler / unde alle ire nâchkomenden / êwiclîche haben unde niezen /. âne mannegelîches irrunge /
- 12,14 âne alle geværde /. unde swaz des rietes disunt den lâchenen / wider Merdingen ist daz sûlen die von Walthershoven .. unde die von Merdingen .. unde die von Harthûsen /. unde alle ire nâchkomenden / ouch êwiclîche haben /
- 12,15 unde niezen / âne mannegelîches irrunge / âne alle geværde . wir die vore genanten / der abbet von sancte Marien .. der kommentiur unde die bruoder von dem diutischen hûse /. unde Snêwelî /. unde Johannes Kolman .. unde wir
- 12,16 die vore genanten gebûrsamenen / von Walthershoven .. von Merdingen .. von Harthûsen /. unde von Wasenwîler / gemeinliche .. haben ouch gelobet / vûre uns / unde vûre alle unser nâchkomenden .. disen vore genanten underganc / unde
- 12,17 diz dinc / stæte ze habende /. unde niemer dâ wider ze komende noch ze tuonde / mit worten noch mit werken / dechein wîse .. unde verzîhen uns dâr über / vûre uns / unde vûre alle unser nâchkomenden . alles rehtes / unde gerihtes /
- 12,18 geistliches / unde wereltliches .. stetterehtes / unde lantrehtes /. unde gewonehte /. unde aller der dinge / dâ mite wir / oder dechein unser nâchkomenden .. dechein dinc möhten getuon / nû / oder her nâch wider diz vore geschriben
- 12,19 dinc / lützel / oder vile /. mit worten / oder mit werken dechein wîse / âne alle geværden her über ze einem wâren urkunde /. unde ze einer êwigen bestætigunge /. sô hân wir / die vore genanten / der abbet von
- 12,20 sancte Marien . unser ingesigel /. unde der kommentiur / unde die bruodere / von dem diutischen hûse /. unsers hûses ingesigel /. unde Snêwelî /. unde Johannes Kolman .. unser beider ingesigele /. gehenket / an disen gegenwertigen

- 12,21 brief .. unde uns die vore genanten gebûrsamenen / begenüeget wole / mit der selben unserre hêrren ingesigelen vûre uns selber an disem brieve /. wan wir eigener ingesigele niut en haben /. hier bî
- 12,22 wâren dise geziuge . von Vrîburc / hêrr Kuonrât Dietrîch Snêwelî / ein ritter /. hêrr Burchart von Tottenhoven /. Wernher der Niener /. Berhtolt von Kölne /. unde von Brîsach .. Rüedegêr / von Munzenheim /.
- 12,23 Vechelî .. unde von Wasenwîler Klâwes der / voget .. unde ander êrbær liute genuoge . dirre brief wart gegeben / ze Vrîburc . in dem jâre . dô man zalte . von gotes gebûrte /. driuzehen /
- 12,24 hundert jâre /. unde ahtzehen jâre an dem næhesten zîstage / nâch sancte Johannes des toufærs tage / ze sîngihten
- 13,1 allen die disen brief sehent / oder hoerent lesen /. künden wir Johannes Klingelhuot /. unde Gylie sîn êlichiu wirtinne /. daz wir beidiu sament / einhellicliche /. die maten / unde
- 13,2 swaz dâr zuo hoeret /. die wir hatten / unde unser was .. diu dâ lît ze Kirchzarten / under dem dorfe /. an der hêrren maten von Oberriet /. diu vern Birkedörfinnen sæligen
- 13,3 was /. zwelif mannemate . der man spricht / vern Birkedörfinnen brüel /. haben ze koufende gegeben / unde ûf gegeben / ledicliche . Johannese dem wîzen
- 13,4 sûtære /. einem burgære von Vrîburc /. ime /. unde allen sînen erben / unde nâchkomenden / êwicliche / ze habende / unde ze niezende /. in dem rehte / daz niut anders dâ von
- 13,5 gât / wan Heinrîche meier Niezen / jærgelîches / sehs schillinge pfenninge / gewonelicher Brîsgöuwær ze zinse /. umbe ahtzehen marke / silbers / loetiges . Vrîburgær gewæges /.
- 13,6 unde sîn wir des selben silbers ganzliche von ime gewert /. wir haben ouch gelobet / vûre / uns / unde vûre alle unser erben unde nâchkomenden /. dem vore genantem Johannese
- 13,7 dem wîzen sûtære /. sîn / unde aller sîner erben / unde nâchkomenden / wer ze sînde /. der vore genanten maten /. unde swaz dâr zuo hoeret /. in dem rehte also dâ vore geschriben
- 13,8 stât / iemer mêr gegen / allermannegelîchem / also reht ist /. her über ze einem urkünde . unde daz diz vore geschriben dinc wâr / unde stæte belîbe /. sô ist dirre
- 13,9 brief / mit mînem des vore genanten hêrrn Johanneses Klingelhuotes ingesigel . unde durch unser aller drîer bete beidenthalp / ze einem urkünde mit des edeln unsers
- 13,10 hêrren / grâven Kuonrâtes / hêrren von Vrîburc / ingesigel / besigelt /. wan wir ez mit sînem willen unde wizzende getân haben /. unde wir / grâve Kuonrât hêrre ze Vrîburc
- 13,11 haben durch ir aller drîer bete beidenthalp / unser ingesigel ouch gehenket an disen brief / ze einem urkünde / dises vore geschribenen dinges .. wan ez mit unserre
- 13,12 wizzende /. unde willen / unde mit unserre hant geschehen ist /. hier bî wâren dise geziuge . hêrr Snêwelî in dem hove / ein ritter /. meister Wernher der zimberman /.

- 13,13 Kuonrât Töldelî /. Berhtolt Vinke .. Borhohe der alte von Valkenstein /.
Johannes Borhohe sîn sun .. Pêter von Selden /. unde ander êrbær liute
genuoge .. dirre
- 13,14 brief wart gegeben / ze Vrîburc / in dem jâre .. dô man zalte / von gotes
gebürte /. driuzehen hundert jâr /. unde ahtzehen jâr /. an dem nâhesten
zîstage
- 13,15 vore sancte Laurentien tage
- 14,1 wir / bruoder Pêter von Hûsen / prîor / unde der convent gemeinliche /
sancte Willehelmes ordenes / des hûses ze Vrîburc in
- 14,2 Brîsgöuwe /. tuon kunt / allen / die disen / brief sehent / oder hoerent
lesen . daz wir mit unser aller gemeinem râte / unde einhelligem
- 14,3 willen / durch unser nôtdurft / unde nutz / haben ze koufende gegeben /
unde ûf gegeben ledicliche . dem edelm manne Burcharte Meinwarte .
- 14,4 hêrrn Burchart Meinwartes sæligen / eines ritters von Vrîburc / altesten
sune / einem burgær von Vrîburc / zehen schillinge pfenninge /
- 14,5 gewonêlicher Brîsgöuwær / geltes / jærgeliches rehtes zinses / die er uns
selber / jærgeliches / von dem zehenden ze Dietenbach ze zinse
- 14,6 gap /. ime . unde allen sînen erben unde nâchkomenden / daz selbe
jærgelich gelt / êwicliche ze habende / unde ze niezende . in dem rehte
alse wir
- 14,7 ez hatten / âne alle geværde . umbe sehs pfunt pfenninge gewonêlicher
Brîsgöuwær .. unde sîn wir der selben pfenninge ganzliche von ime gewert
/
- 14,8 unde haben ez in unsern gemeinen nutz unde vromen bekêret /. wir
verzîhen uns ouch vûre uns . unde vûre alle unser nâchkomenden / mit
guoten triuwen /
- 14,9 alles des rehtes . sô wir an dem vore genantem jærgelichem gelte hatten //
âne alle geværde /. wir geloben ouch mit guoten triuwen / vûre uns
- 14,10 unde vûre alle unser nâchkomenden / disen vore genanten kouf / unde diz
dinc stæte ze habende / unde niemer dâ wider ze komende noch
- 14,11 ze tuonde / mit geistlichem noch mit wereltlichem gerihte / noch âne
gerihte / mit worten noch mit werken . dechein wîse / âne alle geværde
/.
- 14,12 her über ze einem wâren urkunde / unde ze einer êwigen bestætigung . sô
hân wir unseriu des vore genanten .. prîores . unde des
- 14,13 vore genanten convendes ingesigele / gehenket an disen brief . hier bî wâren
dise geziuge /. Burchart von Keppenbach /. Burchart
- 14,14 Meinwart der jûnger . Kuonrât der zilige /. Ruodolv der spigler .. Pêter von
Selden .. Ruodolv von Dietenbach .. und
- 14,15 ander êrbær liute genuoge /. diz geschach unde wart dirre brief gegeben .
ze Vrîburc . in dem vore genantem hûse / in dem jâre . dô
- 14,16 man zalte / von gotes gebürte . driuzehen hundert jâr / unde ahtzehen jâr
. an sancte Katharinen âbende
- 15,1 allen die disen brief sehent / oder hoerent lesen .. künden wir der
burgermeistær /. der schultheize .. unde der rât / von Vrîburc .. daz

- 15,2 vüre uns kâmen / ze Vrîburc in unser râthûs / vüre unsern offenen rât /
 diu êrbær geistliche vrouwe . swester Anne / diu Lepîn / eppetissinne
 15,3 ze Güntherstal .. und Kuonrât der havenær / der halber /. burgære von
 Vrîburc /. und verzêch sich dâ vore uns / diu selbe eppetissinne . an
 15,4 ir / unde an ir samenunge stat /. lûterliche / unde ledicliche . der pfrüende
 /. eines priesters / die hêrr Kuonrât der havenær sælige ze Güntherstal /
 15,5 gemachet – hatte . unde alles des guotes unde geltes / daz er in zuo der
 selben pfrüende gap /. unde liez si dâ vore uns . die selbe pfrüende
 15,6 unde daz guot unde daz gelt ûf / ledic /. wan der brieu . der in dâr über
 gegeben was / alse geschriben stuont /. daz die vrouwen von Güntherstal /
 15,7 die selben pfrüende wole maht hatten ûf ze lâzende . swenne si wolten ..
 unde liez ouch dâ vore uns . Kuonrât der havenær / der halber / die vore
 genanten
 15,8 vrouwen /. vüre sich unde vüre alle sîne erben / unde nâchkomenden /
 der vore genanten pfrüende . êwiclîche ledic /. wære aber / daz die selben
 vrouwen .. des guotes
 15,9 daz in zuo der pfrüende gegeben wart / ihtesiht behüeben /. dâr umbe
 möhten . hêrrn Kuonrâtes des havenærs sæligen erben / siu wole
 rechtvertigen /.
 15,10 her über ze einem urkünde . sô hân wir / durch ire bete beidenthalp /
 unserre gemeinede ingesigel gehenket an disen gegenwertigen brieu /.
 15,11 diz geschach / unde wart dirre brieu gegeben ze Vrîburc / in dem râthûse /
 vore offenem râte /. in dem jâre .. dô man zalte von gotes
 15,12 gebürte /. driuzehen hundert jâr /. unde ahtzehen jâr . an dem nâhesten
 sameztage / nâch sancte Andres tage / des zwelivboten
- 16,1 allen den die disen brieu an sehent . oder hoerent lesen . künden wir /
 Kuonrât Dietrich Snêweli / von Vrîburc .. voget / unte hêrr des kirchspeles
 ze Kirchhoven / unde swaz dâr zuo hoeret /. unde Otte von Amperingen /
 rittere . und wir /
 16,2 die gebûrsamenen arme unde rîche gemeinliche .. der dôrfær .. ze
 Kirchhoven .. ze Öristetten .. ze Gûetinchoven .. ze Wolvesberc . unde
 ze Amperingen .. daz wir bedæhtliclike / mit unser aller . armer / unde
 rîcher / gemeinem râte .. unde einhelligem
 16,3 willen . durch unser selbes nôtdurft / unde gemeinen nutz unde vromen
 .. haben ze koufende gegeben / unde ûf gegeben ledicliche /. ûzer unserre
 gewalt . den êrbæren geistlichen hêrrn / von gotes willen / abbete Uolrîche
 / unde dem convende /
 16,4 des goteshûses ze sancte Blâsien / in dem Swarzwalde / in Konstanzær
 bischtuome / sancte Benedikten ordenes /. den runs / unde daz wazzer
 / dâr in / ze nemende . unde ze vâhende / swâ si wellent / underhalp der
 lantstrâze / âne alle geværde /
 16,5 ûzer unserre almeinede / ze vüerende ze ire müle ze Offemenningen ..
 vollicliche unde genuoc /. in / unde allen iren nâchkomenden / den runs
 / unde daz wazzer / zuo der selben müle / unde ze iren maten / unde ze
 anderen iren guoten ze Offemenningen /

- 16,6 êwiclîche / ze besitzende /. ze habende / unde ze niezende /. eigenlîche ..
âne alle unser irrunge / unde âne alle geværde . wir haben in ouch gegeben
. zuo dem vore genantem runse / alse verre er under der lantstrâze / durh
unser almeinede
- 16,7 gât / ietwederenthalt des runses vierzehen schuohe breit veldes vüre reht
eigen . vüre künftige missehellige unde krieg /. sô zwischen in / unde
uns /. her nâch möhte ûf gestân .. und mügen / unde sülen siu dâr ûfe /
êwiclîche / ziunen /.
- 16,8 unde setzen .. und wandelen unde tuon / ietwederenthalt des runses swaz
si wellent / unde swaz in vüegent .. und sülen wir siu dâr an / niemer geirren
/ noch gesûmen / dechein wîse / âne alle geværde .. swâ / unde swenne ez
aber unverziunet ist / gânt
- 16,9 denne liute / oder vihe dâr ûf / âne alle geværde / die sol man dâr umbe
niut ze buoze setzen /. âne geværde .. siu mügen ouch daz wuor / daz daz
wazzer in den runs treit / wole rücken /. ûf / unzent an die lantstrâze /
swenne si wellent
- 16,10 unde swie dicke si wellent /. und sol in daz nieman wern .. und swâ daz vore
genante wuor . hinnen hin / iemer mêt / abe brichet / in unserre almeinede
/ dâ sülen siu ez wider machen / underhalt der lantstrâze /. swâ ez in dâ
vüegent /. unde sülen siu dâr
- 16,11 zuo nemen / unsern wasen / unde unser erden / unde steine . swaz si des
dâr zuo bedurfent / ûf unserre almeinede / unde sülen wir siu dâr an niemer
geirren / noch beswæren / dechein wîse / âne alle geværde /. hier mite sol
man die lantstrâze / noch ouch
- 16,12 den wec der von Kirchhoven gât / niut boeseren . âne alle geværde .. swâ
aber daz wazzer oberhalbe der lantstrâze / von in wolte brechen .. dâ sülen
unde mügen / siu wole ez wider in kên / in ire wuor / unde in iren runs
/ swâ si dâ wellent / und
- 16,13 swie dicke si wellent .. mit unserm wase / und mit unserre erden / unde
steinen / ûfen unserre almeinede /. unde sol siu dâr an nieman irren / noch
beswæren dechein wîse / âne alle geværde .. unde sol doch dâr umbe niut
ire eigen sîn .. umbe
- 16,14 diz vore geschriben dinc / hânt uns die vore genanten geistlichen hêrren /
gegeben / vier unde zweinzic marke / silbers loetiges / Vrîburgær gewæges
.. unde sîn wir des selben silbers ganzliche von in gewert . in rehtes koufes
wîs / unde haben ez in unser
- 16,15 aller gemeinen / schînbærn / nutz unde vromen bekêret . und haben dâ
mite gekoufet / die almeinede ob Birkeberc /. der man spricht Kirchhovær
almeinede . wære ouch daz got wende . daz den vore genanten geistlichen
hêrren / ieman / von Kirchhovær
- 16,16 kirchspele /. an dem vore genantem runse . oder an dem wazzere . oder
an dem wuore /. hinnen hin / iemer mêt /. decheinen schaden / oder
bresten tete /. von dem sol man ze Kirchhoven / iren boten / dâr umbe /
ein unverzogen reht tuon .. alse von
- 16,17 irem eigen /. der des niut tuot / sô mügen siu in dâr umbe rehtvertigen swâ
siu wellent .. wir / die vore genanten rittere /. Kuonrât Dietrich Snêwelî ..
unde Otte von Amperingen /. unde wir . die vore genanten gebûrsamenen
/ arme / und

- 16,18 rîche gemeinlîche . haben ouch gelobet und geloben mit disem gegenwertigem brieve /. vûre uns /. unde vûre alle unser erben unde nâchkomenden /. den vore genanten geistlîchen hêrren .. ire .. unde aller ire nâchkomenden / wer ze sînde . dises vore geschribenen
- 16,19 koufes / unde dises dinges . in dem rehte / unde mit dem gedinge /. also dâ vore geschriben stât .. vore geistlîchem / unde vore wereltlîchem gerihte /. swaz si es bedürfent / unde an uns gevordert wirdet / iemer mêr / gegen allermannegelîchem also reht
- 16,20 ist . wir binden ouch uns / unde alle unser erben / unde nâchkomenden .. diz vore geschriben dinc ganzlîche stæte ze habende / unde niemer dâ wider ze komende noch ze tuonde /. mit worten noch mit werken dechein wîse / âne alle geværde .
- 16,21 her über ze einem êwigen urkünde . unde daz diz vore geschriben dinc alles wâr unde stæte belîbe /. âne alle geværde .. sô hân wir die vore genanten rittere / unser beider ingesigele / gehenket an disen gegenwertigen brief .. dâr
- 16,22 zuo ist ouch dirre selbe brief / durch unser aller bete beidenthalp / mit des edeln unsers genædigen hêrren /. grâven Kuonrâtes hêrren von Vrîburc /. ingesigel . unde mit der burgær von Vrîburc / gemeinede ingesigel . besigelt /.
- 16,23 ze einem urkünde . alles dises vore geschribenen dinges /. wir / grâve Kuonrât hêrre ze Vrîburc .. unde wir der burgermeistær .. und der rât / von Vrîburc .. haben durch der vore genanter beider teile bete beidenthalp /.
- 16,24 unseriu vore genanten ingesigele /. gehenket an disen gegenwertigen brief /. ze einem urkünde . dises vore geschribenen dinges /. unde uns die vore genanten gebûrsamenen alle gemeinlîche /. begenüezet wole . mit unsers vore genanten
- 16,25 hêrren .. hêrrn Kuonrât Dietrîch Snêwelînes ingesigel vûre uns selber an disem brieve /. wan wir eigener ingesigele niut haben /. hier bî wâren dise geziuge .. meister Wernher von Rînegge . kôrhêrre ze sancte Stephan ze Konstanze ..
- 16,26 hêrr Heinrîch von Munzingen . der burgermeistær . hêrr Snêwelî Bernlape / der schultheize . hêrr Snêwelî in dem hove /. hêrr Johannes Snêwelî der Grezer .. rittere . hêrr Ruodolv von Waldeshuot liutpriester ze Kirchhoven .. Otteman von
- 16,27 Keisersberc .. hêrr Wernher der Hevenlær der pfaffe . Guotman sîn bruoder .. Johannes der vlabsbliuwel /. Johannes von Öristetten .. Franze . unde Pêter /. unde Johannes / gebrüedere von Amperingen .. Gotevrit von Amperingen / Heinrîch der
- 16,28 Vockenhûsær .. unde von Öristetten .. Kuonrât der Smueger .. Küenî Stürme .. Johannes sîn bruoder .. Kuonrât der Biengær /. Burchart Stürme . Heinrîch Birkedorf .. Heinrîch in der mûle /. unde von Kirchhoven .. Burchart Lieberman .. Berhtolt
- 16,29 der kellær .. Burchart Stürme /. Klâwes vore dem tore /. Gêrhart der Smueger /. unde von Amperingen /. Kuonrât /. unde Wernher .. unde Burchart / gebrüedere / genant von Zezzinchoven /. Kuonrât der pfluoger /. unde Wernher

- 16,30 sîn bruoder .. Pêter von Selden der burgær schrîbær .. unde ander êrbær
liute genuoge . dirre brieve wart gegeben / ze Vrîburc / in dem jâre . dô man
zalte / von gotes gebûrte /. driuzehen hundert jâr /. unde ahtzehen
16,31 jâr .. an sancte Lucien tage
- 17,1 allen die disen brieve seht oder hoerent lesen . kûnde ich Otte von
Amperingen ein ritter . unde wir / diu gebûrsame
17,2 gemeinliche /. ze Offemenningen /. daz der kouf . der dâ geschehen ist von
des goteshûses wegen von sancte
17,3 Blâsien /. umbe daz wazzer / unde umbe daz wuor .. unde umbe den runs
/ zuo des selben goteshûses mûle /. unde ze
17,4 sînen maten / unde ze anderen sînen guoten ze Offemenningen /. mit unser
aller unde aller der die guot ze Offemenningen
17,5 hânt /. guotem willen unde gehellunge . und gegenwerticheit / geschehen
unde getân ist . unde verzîhen uns und haben
17,6 uns verzigen /. offenkliche mit disem brieve /. des almeinede weges . der dâ
gât . durh des vore genanten goteshûses von sancte
17,7 Blâsien eigen /. bî dem mûlewuore ûf . unzent an Kirchhovær almeinede .
wan uns daz selbe goteshûs hæte gegeben / ze
17,8 einer rehter widerlegunge /. ein vuozpfat durch sîn eigen / bî dem selben
wuore ûf unzent an die lantstrâze . /
17,9 her über ze einem urkunde .. unde daz diz vore geschriben dinc wâr ist ..
sô hân ich der vore genante ritter mîn ingesigel
17,10 gehenket an disen brieve .. unde uns die vore genanten gebûrsame
begenüegete wole mit dem selben ingesigel vûre
17,11 uns selber an disem brieve /. hier bî wâren dise geziuge /. hêrr Wernher der
hêrr Wernher der hevenlær . der pfaffe .
17,12 Guotman sîn bruoder /. bruoder Kuonrât Niuwelîn pflegær ze Adelnhûsen
. bruoder Berhtolt der pfister an der vrouwen
17,13 von Adelnhûsen stat .. Pêter von Selden /. unde Offemenningen .. der
hiusær /. Brûne der pfuoger . Johannes der
17,14 Steinbrûchel /. Johannes der pfuoger .. der Wigelær /. Êberhart von
Schalstat .. diu Hiunin /. unde ander êrbær liute
17,15 genuoge /. daz geschach unde wart dirre brieve gegeben / ze Offemenningen
/ in dem jâre dô man zalte / von gotes gebûrte /.
17,16 driuzehen hundert jâr / unde ahtzehen jâr /. an sancte Lucien tage
- 18,1 allen die disen brieve seht / oder hoerent lesen .. kûnde ich Johannes
Æderlî / dem man sprichet
18,2 von Stiulingen / ein burgær von Vrîburc .. daz ich niunzehen schillinge
pfenninge /
18,3 gewonlicher Brîsgöuwær /. unde driu hûenere / geltes / jârgeliches ze
sancte Martines messe rehtes zinses
18,4 die ich hatte / von den guoten diu hier nâch geschriben stânt /. hân ze
koufende gegeben / unde ûf /
18,5 gegeben ledicliche / den êrbâren geistlichen vrouwen /. der eppetissinnen
/ unde dem convende /

- 18,6 der klôstervrouwen ze Güntherstal / des ordenes von Citels / in / unde allen
iren nâchkomenden / êwiclîche /
- 18,7 ze habende / unde ze niezende / vûre ledic eigen /. umbe vûnf schillinge /
unde einlif pfunt
- 18,8 pfenninge / gewonelîcher Brîsgöuwær /. unde bin ich der selben pfenninge
ganzlîche von in gewert /. unde sint
- 18,9 diz diu guot / dâ von der zins gât /. Kuonrât Kûgellînes sæligen vrouwe /
ze Eistat / gît jærgelîches /
- 18,10 vûnvzehen schillinge pfenninge unde zwei hûenere /. von vier mannematen
ze Eistat / heizent
- 18,11 diu huopmate / lît an Heinrîches maten von Eistat /. sô gît Pêter der Seckel
/ von
- 18,12 dem slupfe jærgelîches / vier schillinge pfenninge / unde ein huon / von
einer jûcharten maten lît bî
- 18,13 der Slûchmate / under dem reine . in Liutenwîlær banne /. ich hân ouch
gelobet / vûre mich / und
- 18,14 vûre alle mîne erben unde nâchkomenden / den vore genannten geistlîchen
vrouwen / in unde allen iren nâchkomenden /
- 18,15 vûre mich / unde vûre alle mîne erben unde nâchkomenden / wer ze sînde
. des vore genannten jærgelîchen
- 18,16 geltes / in dem rehte also dâ vore geschriben stât iemer mêr / gegen
allermannegelîchem also reht ist
- 18,17 her über ze einer bestætigung . ist dirre brief mit mînem ingesigel / unde
durh unser bete beidenthalp
- 18,18 ze einem urkûnde / mit der burgær von Vrîburc ingesigel / besigelt / hier
bî wâren dise geziuge /. hêrre
- 18,19 Heinrîch von Munzingen . Walther von Valkenstein .. Rûedegêr der
Kîchende /. Kuonrât der malterær . Klâwes
- 18,20 Zinge unde ander êrbær liute genuoge / dirre brief wart gegeben ze Vrîburc
/ in dem jâre / dô man
- 18,21 zalte von gotes gebûrte driuzehen hundert jâr / unde niunzehen jâr / an
sancte Angnesen âbende
- 19,1 allen die disen brief sehent / oder hoerent lesen .. kûnde ich Mehthilt
Schalunin / Heinrîches Schalunen des metzjærs sæligen swester / von
- 19,2 Vrîburc .. daz ich ein pfunt pfenninge / gewonelîcher Brîsgöuwær .. unde
ein malter roggen .. unde drîe sestær boumnûzze / geltes / jærgelîches /
- 19,3 ze sancte Martines messe rehtes zinses /. die ich hatte . unde mîn wâren /.
die ich / umbe vern Salguot die Werrinnen koufete /. von dem
- 19,4 guote ze Eistat in dem banne / daz hier nâch geschriben stât .. hân ze
koufende gegeben . unde ûf gegeben lediclîche / den êrbæren geistlîchen
- 19,5 vrouwen /.. der eppetissinnen / unde ... dem convende / der klôstervrouwen
. ze Güntherstal / bî Vrîburc in Konstenzær bischtuome / des ordenes
- 19,6 von Citels / in /. unde allen iren nâchkomenden êwiclîche ze habende /
und ze niezende / vûre ledic eigen .. umbe ein pfunt unde zweinzic
- 19,7 pfunde pfenninge / Brîsgöuwær / unde bin ich der selben pfenninge
ganzlîche / von in gewert /. unde ist diz daz guot dâ von der zins

- 19,8 gât /. ein jûchart ackers ze Rickebach /. anderhalp jûchart ackers / ze Winberc .. vier mannemate / ze Phaffenfurt
- 19,9 zwei zweiteil an der Stegematen /. unde zwei lendelîniu in Lengental /. dâ von gebent / Johannes Lœuke / einen mütte roggen / unde zehen schillinge
- 19,10 pfenninge /. unde Herman Lœuke /. einen mütte roggen /. drîe sestær boumnütze /. unde zehen schillinge pfenninge / jærgelîches ze zinse / unde
- 19,11 ist ire erbe /. ich / diu vore genante Mehthilt Schalunîn . hân ouch gelobet vüre mich / unde vüre alle mîne erben unde nâchkomenden /. den vore genanten
- 19,12 geistlîchen vrouwen /. ire / unde aller ire nâchkomenden wer ze sînde / des vore genanten jærgelîchen geltes / in dem rehte also dâ vore geschriben
- 19,13 stât / iemer mêt / gegen allermannegelîchem / also reht ist /. her über ze einem urkünde / ist dirre brieve / durch unser bete beidenthalp /
- 19,14 mit der burgær von Vrîburc . ingesigel besigelt .. hier bî wâren dise geziuge /. hêrr Heinrich von Munzingen der burgermeistær .
- 19,15 hêrr Snêwelî in dem hove / rittere /. Johannes der Lülleche /. Ruodolv von Ouwe /. Kuonrât Töldelî .. Burchart der goltsmit .. Berhtolt
- 19,16 Statze . unde ander êrbær liute genuoge /. diz geschach / unde wart dirre brieve gegeben ze Vrîburc / in dem jâre / dô man zalte /
- 19,17 von gotes gebûrte /. driuzehen hundert jâr /. unde niunzehen jâr /. an sancte Valentînes tage
- 20,1 wir / bruoder Êgen von Vürstenberc .. kommentiur . unde die bruodere gemeinlîche /. sancte Johanneses ordenes /. spitâls / von Jerusalem /. des hûses ze Vrîburc in Brîsgöuwe . unde wir / swester
- 20,2 Anne Lepîn .. eppetissinne /. unde der convent gemeinlîche /. der klôstervrouwen / ze Güntherstal / in Konstenzær bischtuome /. des ordenes von Citels . tuon kunt allen den / die disen brieve sehent /. oder
- 20,3 hoerent lesen /. daz wir beidenthalp / mit unser aller gemeinem râte / unde einhelligem willen /. lieplîche / unde guotlîche /. mit einander / mit êrbæreren liute râte /. sîn verrihtet / unde ganzlîche verslihtet /.
- 20,4 umbe die missehellige / sô wir beidenthalp sament hatten /. umbe die viheweide / der dôrfær / unde der gebûrsamenen / von Kirchzarten / unde von Niuwenhûsere / also /. daz die
- 20,5 selben benne /. unde die viheweiden /. der selben beider dörfer / sint / mit unser willen unde wizzende unde gegenwerticheit beidenthalp /. undergangen /. ûz gescheiden /. unde gelâchenet / mit der vore genanten
- 20,6 beider gebûrsamenen / wizzende / unde willen / also hier nâch geschriben stât /. unde mit worten unterscheiden ist /. daz êrste lâchen ist /. von dem steine der dâ lît / an dem Êngeberge /. undenân über her
- 20,7 die rihte / under der langen maten / an den alten graben / über an den wec / an Böschenbrüel /. oberhalbe den vore geschribenen lâchenen / ist ez Kirchzartær ban /. unde underhalp ist ez Niuwenhûserre
- 20,8 ban /. unde denne von Niuwenhûserre kirchwege also der grabe / abe gât / zwischen .. Böschenbrüel / unde der smiden maten /. unzent an die Bliuwelmaten /. swaz jenent dem graben

- 20,9 ist /. daz ist Kirchzartær ban . swaz disunt ist /. daz ist Niuwenhuserre
ban / der selbe grabe sol gemeine sîn /. unde sol nieman dem andern bûwe
dâr ûz wern / also her ist komen /. in dem
- 20,10 graben sol nieman den andern pfenden .. unde denne von der Bliuwelmaten
/. zwischen mangoldes mettelîne /. unde ageleien acker / also der rein her
abe ziuhet / unzent an des Sûtærs brüel .
- 20,11 daz ist jenent / der ban von Kirchzarten .. unde disunt / der ban von
Niuwenhûsern /. unde denne von ageleien acker /. entzwischen des Sûtærs
brüel / unde Hartmanninnen maten / also diu lâchen her
- 20,12 abe gânt / unzent an Hugues mettelîn / unde dâ über / unzent an des
Vreidærs maten /. unde dâ abe also diu lâchen gânt / unzent an Humbellînes
wîde /. swaz dâ lît / jenent / also diu lâchen
- 20,13 scheident /. daz ist Kirchzartær ban /. unde daz disunt daz ist
Niuwenhuserre ban /. die von Niuwenhûsern hânt daz reht / swâ
Kirchzartær hertvihe / vore gât / siben nahte /. dâ sülen siu
- 20,14 nâh varn mit / irem vihe / âne alle geværde . unde sweder teil dem andern
in sînen ban vert / dem sol man dâr umbe pfenden also . her ist komen /
âne alle geværde . wir der vore genante
- 20,15 kommentiur / unde die vore genanten bruodere /. unde wir die vore
genanten klôstervrouwen /. geloben ouch mit guoten triuwen / vûre uns /
unde vûre alle unser nâchkomenden /. disiu vore geschribenen dinc .
- 20,16 stæte ze habende /. unde niemer dâ wider ze komende ze tuonde / mit
geistlichem / noch mit wereltlichem gerihte /. noch âne gerihte mit worten
noch mit werken dechein wîse / âne alle
- 20,17 geværde /. her über ze einem wâren urkünde unde ze einer êwigen
bestætigunge /. sô hân wir der vore genante kommentiur / unde die vore
genanten bruodere /. unsers vore genanten hûses
- 20,18 ingesigel /. unde wir die vore genanten klôstervrouwen /. unser der vore
genanten eppetissinnen ingesigel /. gehenket an disen gegenwertigen brief
/. dâr zuo ist ouch dirre selbe brief / durch
- 20,19 unser bete beidenthalp ze einem urkünde /. mit des êrbærn ritters hêrrn
Snêwelînes Bernlape /. unde mit Snêwelînes . sînes vetern sæligen sunes
/ ingesigelen besigelt /. unde wir / die vore genanten
- 20,20 Snêwelî Bernlape / ein ritter / schultheize ze Vrîburc /. unde Snêwelî hêrrn
Johannes Snêwelînes sæligen sun / eines ritters von Vrîburc /. haben durch
der vore genanten beider teile bete /. unser
- 20,21 beider ingesigele /. ouch gehenket an disen gegenwertigen brief /. ze einem
urkünde / dises vore geschribenen dinges / wan wir selber dâ bî wâren /
unde ez sâhen unde hôrten daz si beidenthalp
- 20,22 der vore genanten ûzrihtigunge also / sament ze beiden sîten überein kâmen
/. unde uns dem vore genanten convende von Güntherstal /. begenüeget
wole / mit unserre vrouwen der eppetissinnen
- 20,23 ingesigel vûre uns selber an disem brieve /. wan wir von ordene anders
ingesigels niut pflegen ze habende . hier bî wâren dise geziuge /. Heinrîch
meier Niezzen .. Kuonrât der zilige /. Pêter
- 20,24 von Selden /. unde die gebûrsamenen gemeinliche /. von Kirchzarten /
unde von Niuwenhûsern /. unde ander êrbær liute genuoge /. diz geschach
/ unde wart dirre brief gegeben / ze Niuwenhûsern

- 20,25 in dem banne / ûf den maten / in dem jâre . dô man zalte /. von gotes gebürte . driuzehen hundert jâr /. unde niunzehen jâr /. an dem næhesten zîstage .. nâch sancte Ambrosien tage /. in dem aberellen
- 21,1 allen den die disen brief sehent / oder hoerent lesen .. künden wir / Grêgôrie von Valkenstein / ein ritter /. unde vrouwe Liutgart von Stoufenberc / sîn êlîchiu wirtinne /. daz wir /
- 21,2 beidiu sament / mit unser beider einhelligem willen . haben gegeben / unde ûf gegeben / ledicliche / von der hant / driu pfunt pfenninge / jærgeliches geltes /. von den guoten diu
- 21,3 hier nâch geschriben stânt /. unseren tohteren / swester Annen .. unde swester Cecilien /. die ze Güntherstal in dem klôster sint /. in beiden .. unde ir ietwederre nâch der anderen tôde /.
- 21,4 daz selbe jærgelich gelt / ganzliche ze habende unde ze niezende /. ir beider nôtdurft dâ mite ze bezzernde /. ze einem rechten lîpgedinge / alle die wîle / sô si beide /. oder ir dewederiu
- 21,5 lebent /. unde swenne si beide ersterbent /. sô sint des selben jærgelichen geltes /. zwei pfunt pfennincgeltes / den klôstervrouwen von Güntherstal / êwiclîche ledic unde gevallen /.
- 21,6 mit dem gedinge /. daz si unser beider jârgezîte / êwiclîche / jærgeliches der zît sô si gevallent / dâ mite sûlen begân / ob irem tische /. unde ouch mit singende / unde mit lesende /.
- 21,7 âne alle geværde /. durch got .. unde durh unser unde unserre vorderen sêlen heil /. überlebet aber hêrrn Kuonen von Valkenstein tohter Margareta /. die vore genanten zwô geswestern ..
- 21,8 beide /. unde kumet si ze Güntherstal in daz klôster /. sô sol si nâch ir beider tôde /. der vore genanten drîer pfunde pfennincgeltes /. ein pfunt pfennincgeltes / haben /
- 21,9 ze einem lîpgedinge / ire nôtdurft dâ mite ze bezzernde /. alle die wîle si lebet /. unde swenne si erstirbet / sô vellet daz selbe pfunt pfennincgeltes ouch den vrouwen von Güntherstal /.
- 21,10 ouch êwiclîche zuo den vore genanten zwein pfunden pfennincgeltes /. ze unser beider jârgezîten /. stirbet aber diu selbe Margareta / êr / die vore genanten zwô geswestern /. oder
- 21,11 kumet niut ze Güntherstal . sô vallent diu vore genanten driu pfunt pfennincgeltes /. nâch der selben beider geswestern tôde ganzliche / den vore genanten klôstervrouwen êwiclîche /.
- 21,12 unser beider jârgezîte dâ mite ze begânde /. also dâ vore geschriben stât / âne alle geværde /. unde sol man diu selben driu pfunt pfennincgeltes / jærgeliches ze sancte Martines
- 21,13 messe ganzliche gewert hân /. unde sint diz diu guot / dâ von diu vore genanten driu pfunt pfennincgeltes / jærgeliches gânt /. man gît jærgeliches von Ruven guote ûf der steige .
- 21,14 ein pfunt pfenninge .. unde ein pfunt pfenninge /. von einem ahteile des zolles ze Valkenstein .. daz wir umbe Heinrîchen sæligen von Valkenstein koufeten /. sô gânt zehen schillinge

- 21,15 pfenninge /. von den vünf unde drîzic schillingen pfennincgeltes / von dem guote ze Attental / daz der strûbe / umbe den selben zins von uns hæte .. unde zehen schillinge pfenninge ..
- 21,16 gît man von dem guote ze VÊrstetten / daz wir umbe Kûenzen von ZÊringen koufeten /. her über ze einem urkûnde /. unde daz diz vore geschriben dinc wâr unde stæte belîbe . sô hân ich der
- 21,17 vore genante ritter / Grêgôrie von Valkenstein / mîn ingesigel gehenket an disen brief / unde mich sîne vore genanten êlîchen wirtinnen / begenüezet wole mit dem selben ingesigel vûre mich selber
- 21,18 an disem brieve . wan ich anders eigenes ingesigels niut en hân /. unde wir / Johannes von Munzingen . der râmener /. unde Kuone von Valkenstein / rittere . haben ouch / unser beider ingesigele
- 21,19 gehenket / an disen brief / ze einem urkûnde / dises vore geschribenen dinges /. wan ez ouch mit unser beider wizzende / unde willen geschehen ist .. hier bî wâren dise geziuge . hêrr Heinrîch liutpriester
- 21,20 ze Kirchzarten /. Wernher .. unde Hanman /. unde Kuone / gebrüedere von Valkenstein /. Pêter von Selden .. unde ander êrbær liute genuoge . dirre brief wart gegeben /. ze
- 21,21 Baldenwec /. in dem jâre . dô man zalte / von gotes gebûrte /. driuzehen hundert jâr /. und niunzehen jâr .. an der mittewochen / in der ôsterwochen
- 22,1 wir / bruoder Êgen von Vûrstenberc / kommentiur / unde die bruodere gemeinliche / sancte Johanneses ordenes /.
- 22,2 spitâles von Jerusalem / des hûses ze Vrîburc in Brîsgöuwe / tuon kunt allen die disen brief
- 22,3 sehent / oder hoerent lesen /. daz Johannes Klingelhuot /. dô er uns daz pfunt pfennincgeltes / ze Kirchzarten
- 22,4 ze koufende gap / mit uns in dem selben koufe / mit gedinge überein kam /. von des dritteiles
- 22,5 unde des zinses wegen . sô man uns gap /. von dem mettelîne / daz dâ lît ze Kirchzarten / in der Birkedörfinnen
- 22,6 brüel obenân heizet der Sestrerinnen mettelîn /. unde ist sîn ein zweiteil / alse /. daz wir vûre
- 22,7 uns / unde vûre alle unser nâchkomenden / ime / unde allen sînen erben unde nâchkomenden /. daz selbe mettelîn haben
- 22,8 êwicliche ledic gelâzen eigenliche / des dritteiles / unde des zinses sô man uns dâ von gap /. unde haben uns
- 22,9 verzigen / des rehtes / sô wir dâr an hatten âne alle geværde /. her über ze einem urkûnde /. unde ze einer
- 22,10 bestætigunge /. sô hân wir unsers vore genanten hûses ingesigel gehenket an disen brief /. hier bî wâren dise
- 22,11 geziuge /. Heinrîch meier Niezzen /. Kuonrât der zilige /. Pêter von Selden /. unde die gebûrsamenen von Kirchzarten /
- 22,12 unde von Niuwenhûsern / unde ander êrbær liute genuoge /. unde geschach diu gelübede . ze Niuwenhûseren /.
- 22,13 in dem jâre . dô man zalte / von gotes gebûrte /. driuzehen hundert jâr unde niunzehen jâr /. an

- 22,14 dem zîstage / in der ôsterwochen /. dâr nâch wart dirre brief gegeben / an
dem vierzehenden
- 22,15 tage /. ze Vrîburc ze sancte Johannede in dem vore genantem hûse
- 23,1 allen die disen brief sehent / oder hoerent lesen /. kûnde ich Mehthilt
Snêwelîn /. daz ich ein
- 23,2 pfunt pfenninge gewonêlicher Brîsgöuwær / geltes / jærgelîches halbes ze
sûngihten unde halbes / ze
- 23,3 wîhenachten / rehtes zinses /. von mînem hûse / unde swaz dâr zuo hoeret
/. daz dâ lît ze Vrîburc / bî
- 23,4 den Oberrietærn /. entzwischen Johanneses Stûrmelînes hûse /. unde des
.. Opfingærs schiuren /. hân
- 23,5 ze koufende gegeben /. Heinrîche dem zendenær / dem gerwær / einem
burgær von Vrîburc /.
- 23,6 ime /. unde allen sînen erben / unde nâchkomenden êwicliche ze habende
unde ze niezende . ze êrste / nâch
- 23,7 der hêrscheft / unde der burgær rehte von Vrîburc .. unde nâch
drittehalbem schillinge pfennincgeltes /.
- 23,8 die die vier mûnsterhêrren ze Vrîburc /. ze Vocken sæligen sælgeræte dâr
abe hânt /.
- 23,9 umbe sechzehen pfunt pfenninge gewonêlicher Brîsgöuwær / unde bin ich
der selben pfenninge ganzliche
- 23,10 von ime gewert /. unde swenne ez sich wandelt /. sô gît man ime . unde
sînen erben / unde nâchkomenden vier
- 23,11 pfenninge Brîsgöuwær ze êrschatze /. ich hân ouch gelobet / vûre mich /
unde vûre alle mîne erben /. unde nâchkomenden /.
- 23,12 dem vore genantem Heinrîche dem zendenær /. sîn /. unde aller sîner erben
unde nâchkomenden
- 23,13 wer ze sînde des vore genanten jærgelîchen geltes / in dem rehte also dâ
vore geschriben stât / iemer / mêr /
- 23,14 gegen allermannegelîchem also reht ist /. her über ze einem urkûnde / ist
dirre brief durh unser
- 23,15 beider bete /. mit der burgær von Vrîburc ingesigel . besigelt /. hier bî
wâren dise geziuge / hêrr Snêwelî .
- 23,16 in dem hove /. Heinrîch Gîrsnest .. Johannes der zendenær /. Klâwes von
Hôchdorf /. Pêter von Selden /.
- 23,17 unde ander êrbær liute genuoge /. dirre brief wart gegeben / ze Vrîburc /
in dem jâre / dô man zalte /
- 23,18 von gotes gebûrte /. driuzehen hundert jâr /. unde niunzehen jâr /. an
sancte Urbânes tage
- 24,1 allen den die disen brief sehent / oder hoerent lesen .. kûnde ich Kuonrât
/ Kuonrâtes des smides sæligen sun von Tenzelingen /.
- 24,2 ein burgær von Vrîburc /. daz ich sehs jûcharte ackers / die ich hatte / unde
mîn wâren /. die ich von mînem vater sæligen geerbet
- 24,3 hân /. die dâ ligent ze Tenzelingen in dem banne /. ûf der oberen hoehe an
einander .. hân ze koufende gegeben /. unde ûf gegeben /

- 24,4 ledic unde lære /. unde unverkümbert /. Uolrîche dem metzjær von Gloter
/ einem burgær von Vrîburc /. ime /. unde allen sînen
- 24,5 erben / unde nâchkomenden / êwiclîche / ze habende / unde ze niezende /
vüre ledic eigen /. umbe ahtzehen pfunt – pfenninge /
- 24,6 gewonêlicher Brîsgöuwær /. unde bin ich der selben pfenninge ganzlîche
von ime gewert / ich hân ouch gelobet / vüre mich /. unde vüre
- 24,7 alle mîne erben / unde nâchkomenden /. dem selben /. Uolrîche dem
metzjær /. sîn /. unde aller sîner erben . unde nâchkomenden /. wer ze
sînde /
- 24,8 des vore genantes guotes / in dem rehte alse dâ vore geschriben stât / iemer
mêr / gegen allermannegelîchem alse reht ist /. her über
- 24,9 ze einem urkünde / ist dirre brieve / durh unser beider bete . mit der burgær
von Vrîburc / ingesigel / besigelt /
- 24,10 hier bî wâren dise geziuge . hêrr Heinrîch von Munzingen / der
burgermeistær /. hêrr Snêwelî . in dem hove / rittere . Kuonrât der
- 24,11 Heindinger voget ze Tenzelingen /. meier Heinrîch / meier Dietrîches sun
von VÊrstetten . Burchart Rüedegêr /. Heinrîch der
- 24,12 Elsezzær /. Herman der Krumpbacher /. Kuonrât der videlær /. Herman
Krapfe /. Kuonrât von Lûterbach /. Pêter von Selden /
- 24,13 unde ander êrbær liute genuoge /. dirre brieve wart gegeben / ze Vrîburc /
in dem jâre /. dô man zalte von gotes gebûrte /. driuzehen
- 24,14 hundert jâr /. unde niunzehen jâr /. an sancte Bonifatien ahtodem tage /
in dem brâchôte
- 25,1 allen die disen brieve sehent / oder hoerent lesen /. künde ich Heinrîch der
BÊzzingær /. Heinrîches des BÊzzingærs
- 25,2 sæligen sun / ein burgær von Vrîburc /. daz ich vûnve mûtte / roggengeltes
. jærgelîches ze sancte
- 25,3 Martines messe / rehtes zinses / die ich hatte / von dem guote ze Ufhûsen
in dem banne / daz hier nâch geschriben stât /.
- 25,4 hân ze koufende gegeben / unde ûf gegeben / ledic unde lære /. unde
unverkümbert /. den êrbæren geistlîchen hêrrn /
- 25,5 bruoder Pêtere von Hûsen / prîore /. unde .. dem convende / der bruodere
sancte Willehelmes ordenes /. des hûses /
- 25,6 ze Vrîburc in Brîsgöuwe in / unde allen iren nâchkomenden / êwiclîche ze
habende / unde ze niezende / vüre ledic eigen /
- 25,7 umbe sibentehâlbe / marke / silbers / loetiges / Vrîburgær gewæges /. unde
bin ich des selben silbers ganzlîche von im
- 25,8 gewert /. unde ist diz daz guot dâ von der vore genante zins gât /. unde ist
Walthers von Wüere von Ufhûsen erbe /
- 25,9 umbe den selben zins /. unde swenne ez sich wandelt /. sô gebent / er /.
unde sîne erben / unde sîne nâchkomenden / ein gans
- 25,10 ze êrschatze . vore dem Schiuneberge drittehalbe jûchart / an einer vûrhe
/ an Wîenbûhel zwô jûcharte
- 25,11 hinder den niuwen maten zwô jûcharte /. an Birzenacker / drittehalp
jûchart an einer vûrhe . ze Ufhûsen
- 25,12 hinder den garten bî des zimbermannes acker von Wendelingen /. zwô
jûcharten /. neben dem wirte

- 25,13 bî der .. Glettinnen acker / ein jûchart /. hinder Hartmanne /. unde neben
Brîsache / ein jûchart maten / und
- 25,14 hân ich der vore genante Heinrîch der BÉzzingær / gelobet /. vüre mich /
unde vüre alle mîne erben / unde nâchkomenden /.
- 25,15 den vore genanten geistlîchen hêrren /. ire / unde aller ire nâchkomenden
/ wer ze sînde /. des vore genanten jærgelîchen
- 25,16 geltes / in dem rehte alse dâ vore geschriben stât / iemer mêr /. gegen
allermannegelîchem alse reht ist /.
- 25,17 her über ze einem urkûnde / ist dirre brief / durh unser bete beidenthalp /
mit der burgær von Vrîburc /
- 25,18 ingesigel / besigelt /. hier bî wâren dise geziuge /. hêrr Snêwelî in dem hove
/ ein ritter / Oswalt von Tottinchoven /.
- 25,19 Degenlîn /. Kuonrât Eigel . Kuonrât der malterær /. Pêter von Selden /.
unde ander êrbær liute
- 25,20 genuoge /. dirre brief wart gegeben /. ze Vrîburc /. in dem jâre /. dô man
zalte von gotes gebûrte . driuzehen
- 25,21 hundert jâr /. unde niunzehen jâr /. an dem nâhesten zîstage /. vore sancte
Johanneses tage / ze sîngihten
- 26,1 allen den / die disen brief sehent / oder hoerent lesen /. kûnden wir /
Gêrtrût / diu Johanneses Diethelmes sæligen êlîchiu wirtinne was / ein
burgærinne von Vrîburc /.
- 26,2 unde Johannes ire sun /. daz wir die mûle / diu dâ lît ze Vrîburc vore
Lêhenmâr tore /. entzwischen . der vrouwen von sancte Angnesen hove /.
unde der steinînen
- 26,3 brügge /. an dem mûlerunse /. unde swaz zuo der selben mûle hoeret âne
alle geværde /. haben ze koufende gegeben .. den êrbæren geistlîchen hêrren
/.. dem abbete / unde
- 26,4 dem convende / von Salmanneswîler in Konstenzær bischtuome .. des
ordenes von Citels /. in /. unde allen iren nâchkomenden / êwiclîche ze
habende . unde ze niezende / vüre
- 26,5 ledic eigen /. umbe sehs unde drîzic marke / silbers / loetiges / Vrîburgær
gewæges .. unde sîn wir des selben silbers ganzlîche von in gewert /. unde
hân wir in disen
- 26,6 kouf gevertiget / ze Vrîburc under der rihtlouben / vore offenem gerihte
/ mit urteil /. an dem selben gerihte / sîten / mîn des vore genanten
Johanneses mâge /
- 26,7 Dietrîch Diethelm /. unde Johannes sîn bruoder / ûf iren eit /. daz ez mir
bezzer wære getân denne vermiten /. unde gâben / an dem selben gerihte .
wir die vore genanten
- 26,8 vrouwe Gêrtrût .. unde Johannes . ire sun .. die vore genante mûle / unde
swaz dâr zuo hoeret /. bruoder Kuonrâte dem Tûsser von Tennebach / an
des abbetes / unde des convendes
- 26,9 von Salmanneswîler stat / ûf lediclîche .. wir haben ouch gelobet / vüre
uns / unde vüre alle unser erben unde nâchkomenden /. den vore genanten
geistlîchen hêrren /. in /.

- 26,10 unde allen iren nâchkomenden /. wer ze sînde / der vore genanten mûle /
unde swaz dâr zuo hoeret . in dem rehte / also dâ vore geschriben stât /
iemer mêr / gegen allermannegelîchem
- 26,11 also reht ist /. her über ze einem urkunde wan diz dinc mit urteile geschehen
ist / sô ist dirre brief / mit der burgær von Vrîburc ingesigel / besigelt /.
hier bî
- 26,12 wâren dise geziuge /. bruoder Eigel von Tennebach . der vore genanten
vrouwen sun /. Walther von Valkenstein Hildebrandes sæligen sun saz dâ
ze gerihte /. hêrr Snêwelî in
- 26,13 dem hove der burgermeistær /. hêrr Heinrîch von Munzingen / Meinwart
von Tottinchoven .. Johannes Kûechelî der Üger .. Johannes der münzær ..
Johannes Bitrolf .. und
- 26,14 ander êrbær liute genuoge /. diz geschach / unde wart dirre brief gegeben
/ ze Vrîburc . in dem jâre . dô man zalte / von gotes gebûrte /. driuzehen
hundert jâr / unde niunzehen
- 26,15 jâr /. an dem nâhesten mêntage / nâch des heiligen kriuzes tage / ze
herbeste
- 27,1 wir / bruoder Êgen von Vûrstenberc /. kommentiur / unde die bruodere
gemeinlîche / sancte Johanneses ordenes / spitâles von Jerusalem / des
hûses ze Vrîburc in dem Brîsgöuwe /
- 27,2 tuon kunt allen den / die disen brief sehent / oder hoerent lesen /. daz
wir mit unser aller gemeinem râte / unde einhelligem willen /. vier pfunt
pfenninge /
- 27,3 gewonelîcher Brîsgöuwær / geltes / jærgelîches / halbe ze wîhenachten /.
unde halbe ze sancte Johanneses messe ze sîngihten / rehtes zinses / vore
ûz nâch der hêrscheft
- 27,4 rehte von Vrîburc .. von den sehs pfunden pfennincgeltes / die wir hatten
/ von dem hûse / unde swaz dâr zuo hoeret /. daz dâ lît ze Vrîburc an dem
markete
- 27,5 bî der tolen / vore dem steinbogen über an dem orte /. dem man spricht
ze dem güldînen orte /. haben ze koufende gegeben / unde ûf gegeben /
lediclîche /. rehte / unde rehtlîche ..
- 27,6 Grôze Volkmâre / von Munzingen / einem burgær von Vrîburc .. ime /.
unde allen sînen erben / unde nâchkomenden / êwiclîche ze habende / unde
ze niezende / vûre ledic eigen /
- 27,7 nâch der hêrscheft rehte von Vrîburc /. umbe vier / unde zweinzic marke
/ silbers . loetiges . Vrîburgær gewæges .. unde sîn wir des selben silbers
ganzlîche von ime gewert /.
- 27,8 unde haben ez in unsern / unde unsers vore genanten hûses / nutz unde
vromen bekêret /. unde swer in dem vore genanten hûse ist . der sol den
vore genanten zins jærgelîches
- 27,9 geben /. unde swenne ez sich wandelt /. swer denne in dem vore genantem
hûse ist / der sol geben . dem vore genantem Volkmâre /. unde sînen erben
unde sînen nâchkomenden /
- 27,10 einen kappen ze êrschatze /. wir haben ouch gelobet / vûre uns / unde vûre
alle unser nâchkomenden /. dem selben Volkmâre /. sîn /. unde aller sîner
erben / unde nâchkomenden / wer

- 27,11 ze sînde / des vore genanten jærgelichen geltes in dem rehte / alse dâ vore
geschriben stât / iemer mêr / gegen allermannegelichem alse reht ist /. wir
geloben ouch vûre uns / unde vûre
- 27,12 alle unser nâchkomenden / mit guoten triuwen / disen vore genanten kouf
unde diz dinc stæte ze habende / unde niemer dâ wider ze komende / noch
ze tuonde /. mit geistlichem /
- 27,13 noch mit wereltlichem gerihte /. noch âne gerihte /. mit Worten noch
mit werken / dechein wîse / âne alle geværde /. her über ze einem wâren
urkunde . unde ze einer êwigen
- 27,14 bestætigunge .. sô hân wir unseriu des vore genanten kommentiuers / unde
des vore genanten hûses ingesigele / gehenket an disen brief /. hier bî wâren
dise geziuge /. Kuonrât
- 27,15 Snêwelî der alteste . Volkmâr . der kempfe . Johannes sîn bruoder /.
Johannes Klinge / Pêter von Selden / unde ander êrbær liute genuoge /.
dirre brief wart gegeben / in dem
- 27,16 vore genantem hûse /. in dem jâre /. dô man zalte . von gotes gebûrte /.
driuzehen hundert jâr / unde niunzehen jâr /. an sancte Michels âbende
- 28,1 allen den . die disen brief sehent / oder hoerent lesen /. kûnde ich Gotevrit
von Stoufen /.
- 28,2 ein ritter . daz ich mit mînes veteren /. hêrrn Johanneses von Stoufen
wizzende /. unde willen ..
- 28,3 den halben kirechen satz der kirechen ze Griezheim /. den ich dâ hatte .
unde mîn was /. hân .
- 28,4 ze einem almuosen /. den êrbæren
- 28,5 geistlichen liuten /. bruoder Êgenen von Vûrstenberc / kommentiuere /
unde / den bruoderen
- 28,6 sancte Johanneses ordenes / spitâles von Jerusalem / des hûses ze Vrîburc
in Brîsgouwe /.
- 28,7 in / unde allen iren nâchkomenden / êwiclîche ze habende / unde ze
niezende /. durch got / unde
- 28,8 durch mîner / unde mîner vorderen sêlen heil /. unde hân mich verzigē
alles des rehtes sô
- 28,9 ich dâr an hatte /. unde geloben ouch hier wider / niemer ze komende noch
ze tuonde decheine
- 28,10 wîse / âne alle geværde / her über ze einem wâren urkunde / unde ze einer
êwigen
- 28,11 bestætigunge / sô hân ich mîn ingesigel gehenket an disen brief .. unde ich
der vore genante
- 28,12 Johannes von Stoufen / – ein ritter /. verjihe ouch an disem brieve .. daz
diz vore geschriben
- 28,13 dinc / mit mînem willen unde wizzende geschehen ist /. unde geloben ouch
mit guoten triuwen /
- 28,14 niemer dâ wider ze komende / noch ze tuonde / mit Worten / noch mit
werken /
- 28,15 dechein wîse / âne alle geværde .. her über ze einem wâren urkunde / unde
ze einer êwigen

- 28,16 bestætigunge /. sô hân ich mîn ingesigel ouch gehenket an disen brieve /.
diz beschach /
- 28,17 unde wart dirre brieve gegeben / ze Vrîburc / in dem jâre . dô man / zalte /
von gotes gebûrte /
- 28,18 driuzehen hundert jâr /. unde niunzehn jâr /. an sancte Martines tage
- 29,1 allen den / die disen brieve sehent / oder hoerent lesen /. künden wir Walther
von Tûselingen /. unde Giuse / Albrehtes Spoerlînes tochter / sîn êlîchiu
wirtinne / von Vrîburc /. daz wir beidiu sament einhellicliche /. ahtzehn
- 29,2 pfenninge / unde dritthalp pfunt /. pfenninge / gewonêlicher Brîsgöuwær
. gelt . jârgelîches . ze sancte Martines messe / rehtes zinses . die wir
hatten /. unde unser wâren /. von den guoten / diu hier nâch geschriben
stânt
- 29,3 haben ze koufende gegeben / reht / unde redelîche / unde ûf gegeben
ledicliche /. ûzer unserre gewalt / den êrbâren geistlîchen vrouwen /. der
epetissinne / unde dem convende / der klôstervrouwen ze Gûntherstal bî
Vrîburc
- 29,4 in Konstenzær bischtuome / des ordenes von Citels / in ire gewalte / unde
in ire nützlich gewer /. in / unde allen iren nâchkomenden / êwicliche ze
habende / unde ze niezende / vûre ledic eigen /. umbe zwelif marke silbers
/
- 29,5 loetiges /. Vrîburgær gewæges /. unde umbe ein pfunt pfenninge /
gewonêlicher Brîsgöuwær .. / unde sîn wir des selben silbers unde der
pfenninge ganzliche von in gewert /. unde sint diz diu guot / dâ von der
zins gât /. unde ligent
- 29,6 ze Niuwershûsen in dem dorfe / unde in dem banne . Johannes der
schedelær gît jârgelîches /. zwêne schillinge pfenninge /. unde ze erene
ein huon /. von sînem garten . bî der rosse gazzen /. Eblîn Genselîn gît
- 29,7 zwêne schillinge pfenninge /. unde ze erene einen kappen /. von sînem
hûsesæzede /. unde von sînem garten an der rosse gazzen /. Johannes der
Schernær gît drîe schillinge pfenninge . unde ze erene einen kappen /. von
- 29,8 eines halben mannes maten / lît an den rietern /. unde von einem garten /
lît neben der Schafhûserinnen /. Negellîn gît / vûnf schillinge pfenninge /
unde ze erene ein huon /. von einem garten an rietern .. der
- 29,9 Huober gît zehen schillinge pfenninge /. unde ze erene vier hûenere /. von
sînem hovegesæzede /. unde von sînem garten hinder Rôrsparn hûse ..
Heinrîch der vischær gît /. sehs schillinge pfenninge . unde ze erene zwêne
- 29,10 kappen /. von sînem hovegesæzede . bî der kireche gazzen /. die vrouwen
von Gûntherstal / gebent einliftehalben schillinge pfenninge . unde ze erene
alse vile / von irem hove /. der des meiers sæligen von Sigemanneswalde
- 29,11 was /. Rîche diu Hegenîn / gît zwêne schillinge pfenninge . unde ze erene
zwêne pfenninge /. von ire hovestat / bî Rüedîn bî dem beche /. Johannes
an HÊllegazzen /. gît sehs schillinge pfenninge /. unde ze erene sehs
- 29,12 kappen .. von sînem hovegesæzede /. hinder dem Kûnzeler ... die von
Tennebach gebent / vûnf schillinge pfenninge /. unde ze erene alse vile /
von irem hovegesæzede /. unde ist dirre kouf unde diz dinc geschehen / sît

- 29,13 ich der vore genante Walther / von mînen kinden geteilet hân /. unde mit dem vore genantem gelte wole ich unde mîn vore genantiu êlîchiu wirtinne getuon mohten swaz wir wolten / wir / der selbe Walther von Tûselingen /
- 29,14 unde sîn vore genantiu êlîchiu wirtinne Giuse /. haben ouch gelobet vûre uns / unde vûre alle unser erben / unde nâchkomenden /. den vore genanten klôstervrouwen /. ire /. unde aller ire nâchkomenden / wer ze sînde / des vore
- 29,15 genanten jârgelîchen geltes / in dem rehte alse dâ vore geschriben stât / iemer mêt / gegen allermannegelîchem alse reht ist .. her über ze einem urkûnde / und daz diz vore geschriben dinc wâr / unde stæte belîbe . sô
- 29,16 ist dirre brieve / mit mînem des vore genanten Walthers von Tûselingen ingesigel /. unde durch unser aller bete beidenthalp / mit Albrehtes Spoerlînes ingesigel / ze einem urkûnde besigelt /. ich Albreht Spoerlîn / hân
- 29,17 durch bete /. mîner vore genanten tochter Giusen /. unde Walthers von Tûselingen / ires êlîchen wirtes /. unde der vore genanten klôstervrouwen / mîn ingesigel / ouch gehenket an disen brieve /. ze einem urkûnde dises vore geschribenen
- 29,18 dinges /. hier bî wâren dise geziuge /. hêrr Kuonrât von Tûselingen /. hêrr Kotzer / ritter Johannes der Merse / Johannes unde Ruetschîn gebrüedere /. von Tûselingen / Walthers sune /. Klâwes Statze /. meier Johannes / von
- 29,19 Bottingen / meier Herman Genselîn / von Niuwershûsen /. Pêter von Selden /. unde ander êrbær liute genuoge /. dirre brieve wart gegeben / ze Vrîburc / in dem jâre . dô man zalte . von gotes gebûrte /. driuzehen
- 29,20 hundert jâr /. unde zweinzic jâr /. an dem nâhesten mæntage /. vore unserre vrouwen tage / der êren